

## KORINHTUQ Pê Chyáng Hî Dàm Hun Kat é Laiká (1 Corinthians)

<sup>1</sup> Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, ngamoq é gumang hpó Sositeni gi, <sup>2</sup> jowò hkangmó má nga-nhông é Yhumsîng Yesuq Hkrisduq é myìng lé lêng é bang eq rahá, chyoiyúng bang dut râ matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq mâ é, Garai Gasâng é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsîng nghut lhê.

<sup>3</sup> Nga-nhông é Îwa Garai Gasang eq Yhumsîng Yesuq Hkrisduq chyáng mâ é jeju eq ngingón hkyô gi, nungmoq chyáng ru joq nyî sháng gaq ô.

### *Hkrisduq É Yanmai Wó É Jeju*

<sup>4</sup> Garai Gasâng jeju lé Hkrisduq Yesuq dông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê. <sup>5</sup> Hkâsu mù gâ le, nungmoq gi, Hkrisduq dông mai, nungmoq dang tái é hkyô banshoq eq nungmoq é sumsé hpaqchyî banshoq má je lhoq gumjup é hui bekô nghut ri. <sup>6</sup> Haù gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê. <sup>7</sup> Haù mù, nga-nhông é Yhumsîng Yesuq Hkrisduq dum htoq shit râ lé, nungmoq gyai myoqbyu lêng nyi é u má, nungmoq gi, woi-nyí hkyô eq séng é chyunghuq haí lé le langhpyut kó râ a nghut. <sup>8</sup> Nga-nhông é Yhumsîng Yesuq Hkrisduq é buinyì má, nungmoq lé mara hùn râ hkyô a bò shoq,

Hkrisduq gi, nungmoq lé, htáng shoq gingtíng nhang nyi râ nghut lhê. <sup>9</sup> Nga-nhông é Yhumsîng nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

*Noqkuq Hpúng Má Gam Hkoq Lhûm É Hkyô*

<sup>10</sup> Gumang wui ê, nungmoq hkaû má gam hkoq lhûm é hkyô pé a joq é za, nungmoq é myit eq myit sôn wú é hkyô má gumjup shoq rading ralhum za dut nyi sháng gaq, nungmoq lhunglhâng bang rayuq eq rayuq byìn hpyé gohut huí nyi keq nghû, ngò, nungmoq lé, nga-nhông é Yhumsîng Yesuq Hkrisduq é myìng mai dúng tôngbán kat lhê. <sup>11</sup> Ngá é gumang wui ê, Hkloe é yhûm byù wui gi, nungmoq hkaû má mabyoq htoq hkyô joq é lé, ngo lé hkyáng lo shit akô. <sup>12</sup> Ngò haû su nghû taí é gi, nungmoq mâ é rayuq yuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga, dum rayuq gi, "Ngò gi, Kehpa htâng châng lhê." ga, dum góyuq gi, "Ngò gi, Hkrisduq htâng châng lhê." ga, taí bùm kô é yanmai nghut lhê.

<sup>13</sup> Hkrisduq gi, gam hkoq é hui bê lhú? Ngò Poluq gi, nungmoq é matú tapzîng má jén sat é hui bê lhú? Nungmoq gi, ngá é myìng mai wui-myhup hkâm yù kô é lhú? <sup>14</sup> Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkâm byî wú é yanmai, <sup>15</sup> nungmoq ó yuq le, ngá é myìng mai wui-myhup hkâm yù bê nghû a wó taí é nghut mù, ngò, Garai lé jeju hkya-ôn lhê. <sup>16</sup> (Stehpana é yhumbyù wui lé le, ngò wui-myhup hkâm byî é nghut lhê, haû mai lai luí gotû ó lé hkâm byî záng ashí laq, ngò a myit bun lo nghut ri.) <sup>17</sup> Hkâsu mù gâ le, Hkrisduq, ngo lé nhang kat é gi, wui-myhup hkâm byi râ matú a nghut, gabú danglù hko kyo râ matú sheq nhang kat é ru nghut lhê; nghut kôlhang, waxâng zô wui

é hpaqchyî byéng-yá dang dông hko kyô é a nghut mù, Hkrisduq é tapzing é a-tsam gi, akôm a dut byuq é nghut lhê.

*Garai Ê A-tsam Eq Hpaqchyî Byéng-yá Gi, Hkrisduq*

<sup>18</sup> Hkâsu mù gâ le, tapzîng má Yesuq shî hkâm é hkyô eq sêng é danglù gi, htên byoq hui râ bâng é matú, danggang dut byuq ri; nghut kôlhang, hkyi yu é huî nyî bang nga-nhông é matú gi, Garai Gasâng é a-tsam nghut ri. <sup>19</sup> Hkâsu mù gâ le, Chyúmdang má kê tô é gi,

"Hpaqchyî bò bâng é hpaqchyî byéng-yá lé, Ngò lhoq htên pyám râ nghut lhê; nyan bò bâng é nyan lé, Ngò, ajè dut pyám nhâng râ nghut lhê."✠

ga ri.

<sup>20</sup> Hpaqchyî byéng-yá bò bang gi, hkâmá lhú? Hpaqchyî laiká kung bang gi, hkâmá lhú? Ipyat shi é dang taí kung bang gi, hkâmá lhú? Garai Gasang gi, mingkân é hpaqchyî byéng-yá lé lhoq ngok pyám bê a nghut lhú? <sup>21</sup> Hkâsu mù gâ le, Garai Gasâng é hpaqchyî byéng-yá mai ga jang, mingkan zo wuî gi, yhumsing é hpaqchyî byéng-yá dông mai Garai Gasang lé a wó sé kê é yanmai, danggang gâ pyám byi kê é mungdang lé hko kyô é dông lumjîng bang lé hkyi yù râ matú, Garai Gasang myit hpyit é nghut lhê.

<sup>22</sup> Yudaq byu pé gi, limik kumlhá pé lé dúng akô; Grik byu pé gi, hpaqchyî byéng-yá lé ho akô nghut ri. <sup>23</sup> Nghut kôlhang, ngamoq gi, tapzîng má jén sat huî é Hkrisduq é hkyô lé hko kyô lhê. Haû gi, Yudaq byu pê é matú myit leqbat jowò eq tûngbaù pê é matú danggang dut byuq ri.

<sup>24</sup> Nghut kôlhang, Garai Gasâng èq ji yù huî é Yudaq byu pé eq Grik byu pê é matú, Hkrisduq gi, Garai Gasâng é a-tsam eq Garai Gasâng é hpaqchyî byéng-yá nghut ri. <sup>25</sup> Hkâsu mù gâ le, Garai Gasâng é ngok hkyô gâ é lháng gi, byu

---

✠ 1:19 Esai 29:14

é hpaqchyî byéng-yá htoq má je gyaú ri; Garai Gasâng é wum nyhóm hkyô gâ é lháng gi, byu é wum-o htoq má je gyaú ri.

<sup>26</sup> Gumang wuì ê, Garai Gasang, nungmoq lé ji yu é hkûn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsáng dông hpaqchyî byéng-yá bo é bang, ahkáng ayá wó é bang, zaugun suwún amyû mâ é bang a myô é nghut lhê. <sup>27</sup> Nghut kôlhang, Garai Gasang gi, hpaqchyî byéng-yá bò bang lé hoq lhoq hpu râ matú, mingkan mâ é ngok bang gâ é lé hkyin yu é nghut lhê; Garai Gasang gi, wum bô bang lé hoq lhoq hpu râ matú, mingkan mâ é wum nyhóm bang gâ é lé hkyin yu é nghut lhê. <sup>28</sup> Yhang gi, mingkân eq ahkyak tô é lé lhoq htên pyám râ matú, haí a nghut é lé le, mingkan mâ é aróng a bo é eq wú tiq pyám huí é lé le, hkyin yu é nghut lhê. <sup>29</sup> Haû gi, ó yuq le, Yhâng é hí má a ge nghutbun râ matú nghut ri. <sup>30</sup> Garai Gasâng é yanmai, nungmoq gi, Hkrisduq Yesuq má nghut nyî bekô nghut ri; Hkrisduq gi, nga-nhông é matú, Garai Gasâng chyáng mâ é hpaqchyî byéng-yá dut bê nghut ri. Haû gi, nga-nhông é dingmán hkyô, chyoiyúng hkyô eq hkyi yù hkyô nghut ri. <sup>31</sup> Haû mù luî, "Gumrong é sù gi, haû Yhumsîng má gumrông sháng gaq."☆ ga kê tô é eq rajung za nghut ri.

## 2

### *Woi-nyí Mai Lo É Garai Gasâng É Hpaqchyî Byéng-yá*

<sup>1</sup> Gumang wuì ê, ngò gi, Garai Gasang eq sêng é saksé hkyô lé nungmoq chyáng taí pyô râ matú jé lé é hkûn, dang taí kûng é eq hpaqchyî byéng-yá mó bo é dông lé é a nghut. <sup>2</sup> Hkâsu mù gâ le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huí é hkyô mai lai luî, jung hkangmó lé tô-myhî pyám râ ngû

---

☆ 1:31 Yer 9:24

myit hpyit yû bê nghut lhê. <sup>3</sup> Ngò gi, nungmoq chyáng jé lé é hkún, wum nyhôm é eq gyai yhang gyuq nán é nghut lhê. <sup>4</sup> Ngá é danglù eq ngò hko kyô é hkyô gi, hpaqchyî bo é eq mhuî yu é dang pé dông a nghut é za, Woi-nyí é a-tsâm èq nungmoq lé shit é dông ru nghut mù, <sup>5</sup> nungmoq é lumjínq myit gi, byù é hpaqchyî byéng-yá má a nghut é za, Garai Gasâng é hpungwup a-tsam má nghut nyi lhê.

<sup>6</sup> Nghut kôlhang, ngamoq gi, myit ðing bê bang lé hpaqchyî byéng-yá dông nyo lhê; shí pyat lhê é hpaqchyî byéng-yá eq htên byoq nyi huî é shí pyat mâ é zaú wui é hpaqchyî byéng-yá dông kúm a nghut. <sup>7</sup> Ngamoq taí é gi, haq tô é eq, ahkýng nghu é lhang a joq shi mai nga-nhông é hpungwup shingkâng é matú Garai Gasang tô to byî é hpaqchyî byéng-yá nghut é, Garai Gasâng é zaú tô é hpaqchyî byéng-yá lé taí é ru nghut lhê. <sup>8</sup> Shí pyat lhê é zau wuî gi, hpaqchyî byéng-yá haû lé rayuq lhang a sê gyo kó nghut ri; yhangmoq sê gyo kô é ru nghut le gi, hpungwup shingkang bo é Yhumsîng lé tapzîng má jén sat pyám kó râ a nghut. <sup>9</sup> Nghut kôlhang, Chyúmdang má, "Ó yuq èq le a myang wú, ó yuq èq le a wó gyô wú, ó yuq èq le a bûn myit wú é hkyô lé, Garai Gasang gi, Yhang lé chyitdap bâng é matú lajang to byi bê nghut ri."☆

ga kê tô é eq rajung za nghut ri. <sup>10</sup> Nghut kôlhang, Garai Gasang gi, haû hkyô lé, Yhâng é Woi-nyí dông nga-nhung lé hpông shit bê nghut ri.

Woi-nyí haû gi, jung hkangmó lé ho gôn wú é nghut luî, Garai Gasâng é zaú tô é hkyô lé lhang ho gôn wú é sù nghut ri. <sup>11</sup> Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lhu? Haû eq rajung za, Garai Gasâng é Woi-nyí za a nghut jáng, Garai

---

☆ 2:9 Esai 64:4

Gasang myit é hkyô lé, ó yuq le wó sê é a nghut. <sup>12</sup> Nga-nhúng gi, mingkân é woi-nyí lé hap yu tô é a nghut é za, Garai Gasâng èq nga-nhúng lé byí to bê jeju lé, ngamoq wó sê gyo râ matú, Garai Gasâng chyáng mâ é Woi-nyí lé sheq hap yu tô é ru nghut lhê. <sup>13</sup> Haû mù luí, ngamoq gi, waxâng zô wui é hpaqchyí byéng-yá èq mhoq byí é dang đông taí é a nghut, Garai é Woi-nyí èq mhoq byí é dang đông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang đông taí sân kyô é nghut lhê. <sup>14</sup> Haû Woi-nyí lé a wó é sù gi, Garai Gasâng é Woi-nyí mai lo é hkyô pé lé a hap yu é nghut lhê; haû mù gâ le, haú pé gi, yhâng é matú ngok é hkyô nghut luí, woi-nyí hkyô đông mai haú hkyô lé a wú é yanmai, yhang gi, haú pé lé a wó sê gyo nghut ri. <sup>15</sup> Woi-nyí eq sêng é byù gi, lhunglhang lé wó jéyáng lhê, nghut kôlhang, yhang lé kúm gi, ó yuq èq le wó jéyáng é a nghut. <sup>16</sup> Chyúmdang má,  
 "Hkâsu mù gâ le, ó yuq wá, haû Yhumsing é myit lé sé mù,  
 Yhang lé wó mhoqshit wú é lhú?"<sup>☆</sup>  
 ga kê tô ri. Nghut kôlhang, nga-nhúng gi, Hkrisduq é myit lé wó é bang nghut lhê.

### 3

#### *Noqkuq Hpúng Má Gam Hkoq Lhùm É Hkyô*

<sup>1</sup> Gumang wuê ê, hí hkûn, ngò gi, nungmoq lé, Woi-nyí eq sêng é bang lé đông wó taí é a nghut; mingkan eq sêng é bang đông nghut kômù, Hkrisduq má zonú su dut bang lé đông sheq taí wú é nghut lhê. <sup>2</sup> Nungmoq gi, zoshuq apat lé a wó zo shi kó nghut é yanmai, ngò gi, nungmoq lé náú byi huq é nghut lhê.\* Ahkuí lhang, nungmoq gi, zoshuq apat lé a wó zo shi kó nghut ri. <sup>3</sup> Nungmoq gi, mingkan eq

☆ 2:16 Esai 40:13 \* 3:2 Nungmoq lé náú byi huq é, gâ é gi, lui é hkyô pé lé hí mhoq byí é lé gâ lhê.

sêng é bang ru nghut nyi ashî kó nghut ri. Hkâsu mù gâ le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wuî su nyi yap bum lhê a nghut kó luq? <sup>4</sup>Rayuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga taî nyi bùm kô é nghut jáng, nungmoq gi, mingkan zo wuî nghut nyi bum lhê a nghut kó luq?

<sup>5</sup> Apolo gi, ó wá nghut lhê? Poluq gi, ó wá nghut lhê? Nga-nhik gi, Garaî é dui-nhâng zoshâng za nghut luî, ó le ó lé, haû Yhumsing eq hun tô é muzó eq rajung za wùn waq é nghut luî, nungmoq gi, ngá-nhik dông mai wó lumjîng kô é ru nghut lhê. <sup>6</sup> Ngò gi, gabú danglù amyui lé hô kat, Apolo gi, wuî hpyun byi, nghut kôlhang, yuq kô lò nhang é gi, Garaî Gasang za ru nghut lhê. <sup>7</sup> Haû mù, amyui hô kat sù eq wuî hpyun byi sù gi, ahkyak mó a nghut, yuq kô lò nhang é Garaî Gasang za sheq ahkyak ru nghut lhê. <sup>8</sup> Amyui hô kat sù eq wuî hpyun byi su nhik myoqbyu tô é hkyô gi, rajung za nghut ri; nghut kôlhang, yhumsîng shikut é eq rajung za, ó le ô é shigyau chyunghuq wó yû kó râ nghut lhê. <sup>9</sup> Hkâsu mù gâ le, ngamoq gi, Garaî Gasâng é mù zui luzúm wuî nghut lhê; nungmoq gi, Garaî Gasâng é yò, Garaî Gasâng é yhûm nghut nyi akô.

<sup>10</sup> Garaî Gasang, ngo lé byî to bê jeju eq rajung za, yhûm saî kung sù rayuq dông, ngò gi, yhûm apûn awang hi to bê nghut lhê; gotû byù gi, hau é ahtoq má saî toq jat nyi é nghut lhê. Nghut kôlhang, yuq hkangmó gi, yhumsîng saî é má rago sidiq râ lhê. <sup>11</sup> Hkâsu mù gâ le, hi to gù nghut é, Yesuq Hkrisduq nghu é yhûm apûn awang mai lai luî, ó yuq le, gotû yhûm apûn awang lé wó saî é a nghut. <sup>12</sup> Yhûm apûn awang hau é ahtoq má, hîng, ngùn, hpaudap luqgok pé, sik, mhan, hkowá pé lé chûng mù saî jat kô é nghut jáng, <sup>13</sup> yuq hkangmó é muzó hkâsu nghut é

hkyô lé lhoq htoq shit é hui râ nghut lhê. Haû mù luî gâ le, haû Yesuq é Buinyì gi, haû lé byu-myàng nhâng mù, haû buinyì lé gi, myî eq lhoq htoq shit râ nghut lhê. Haû myi gi, yuq hkangmó saî é muzó hkasû é nghut é lé chyâm râ nghut lhê. <sup>14</sup> Rayuq yuq saî é yhûm gi, ru gîng nyi é nghut jáng, haû yuq gi, yhang é shigyaú chyunghuq wó yû râ nghut lhê. <sup>15</sup> Nghut kôlhang, yhûm haû nyé gyó byuq é nghut jáng, yhang gi, yhûm sûm byuq é hui zo râ nghut lhê; yhang gi, asak lut kôlhang, myishâm mai wó lut é byù su dut râ nghut lhê.

<sup>16</sup> Nungmoq gi, Garai Gasâng é noqkuq yhûm nghut luî, Garai Gasâng é Woi-nyí gi, nungmoq má lúng nyî bê hkyô lé a sé kó lúh? <sup>17</sup> Rayuq yuq, Garai Gasâng é noqkuq yhûm lé lhoq htên é nghut jáng, Garai Gasang gi, haû yuq lé lhoq htên pyám râ nghut lhê. Hkâsu mù gâ le, Garai Gasâng é noqkuq yhûm gi, chyoiyúng lhê; nungmoq gi, noqkuq yhûm haû nghut akô.

<sup>18</sup> Nungmoq gi, yhumsing gùng yhumsîng hkâlhoq nghoq kó. Nungmoq mâ é rayuq yuq, shí ipyat mâ é byù nyî a-tsáng dông hpaqchyî byéng-yá bò sù ga myit é nghut jáng, hpaqchyî byéng-yá akying bò sù wó dut sháng gaq, yhang gi, a-ngok sù dut râ lhê. <sup>19</sup> Hkâsu mù gâ le, mingkan shî mâ é hpaqchyî byéng-yá gi, Garai Gasâng é hí má ngok é hkyô nghut ri. Haû gi, "Garai Gasang gi, hpaqchyî byéng-yá bò bang lé, yhangmoq é hpaqchyî má yhang myí to nhang ri." ☆ ga kê tô é eq rajung za nghut ri. <sup>20</sup> Hau htoq agó, "Haû Yhumsîng gi, hpaqchyî byéng-yá bò bang myit é hkyô pé akôm nghut é lé sê lhê." ☆ ga le kê tô ri. <sup>21</sup> Haû mù luî, ó yuq le, byù eq sêng é hkyô má gyáng é dang a taí kó sháng gaq! Lhunglhang gi, nungmoq é chyat nghut lhê. <sup>22</sup> Poluq le, Apolo le, Kehpa le, mingkan le, dui nyi é hkyô

☆ 3:19 Yob 5:13 ☆ 3:20 Hkya-on 94:11



le, shi é hkyô le, ahkuí lhê hkyô eq htângnùng mâ é hkyô le, banshoq gi, nungmoq é chyat nghut ri. <sup>23</sup> Nungmoq gi, Hkrisduq é nghut akô; Hkrisduq gi, Garai Gasâng é nghut ri.

## 4

### *Hkrisduq É Lagyô Pé*

<sup>1</sup> Haû mù luî, byu pé gi, ngamoq lé, Hkrisduq é dui-nhâng zoshâng wuì dông eq Garai Gasâng é zaú tô é hkyô pé lé taí pyô râ matú ap byî tô é hui bang dông sôn yù râ lhê. <sup>2</sup> Haú dông nghut jáng, ap byî tô é hui bang gi, yhumsîng lhumzui hkyô lé saksé shit râ dut lhê. <sup>3</sup> Nungmoq eq nghut nghut, waxâng zô wui é tarâ rûng mai nghut nghut, ngo lé jéyáng kô le, ngá é matú atiq azo za nghut lhê; gè gè ga jáng, ngá gûng ngò lhang a jéyáng é nghut lhê. <sup>4</sup> Haî mù gâ le, ngá gûng ngò mara a bò bûn é nghut kôlhang, haû gi, ngo lé wó lhoq sân-yúng byî é a nghut. Ngo lé jéyáng é sủ gi, haû Yhumsîng nghut lhê. <sup>5</sup> Haû mù, masat tô é ahkyíng a jé shimá haî lé le a jéyáng é za, haû Yhumsîng jé lé shoq, láng nyî keq. Yhang gi, mauchut hkaû má haq tô é pé lé byu-myàng nhâng mù, byu pê é myit nhiklhum má lúng é hkyô lé lhoq htoq shit râ nghut lhê. Haú hkûn, yuq hkangmó gi, ó le ó wó gíng é hkya-ôn hkyô lé, Garai Gasâng chyáng mai wó yù râ nghut lhê.

<sup>6</sup> Gumang wuì ê, ngò gi, "Kâ tô é gủ mai hkâlai." gâ é sanghkyâng é lichyúm lé, ngamoq chyáng mai nungmoq wó mhoq yủ sháng gaq nghủ, nungmoq é akyu é matú, ngò eq Apolo má haû pé lé yủ mù dangtủ kut é nghut lhê. Haú hkûn, nungmoq gi, nghutbûn é dông, rayuq lé gi, wủ ko, góyuq lé gi, wủ shóm, a kut kó râ nghut lhê. <sup>7</sup> Ó yuq wá, nang lé, góyuq eq shaî shoq kut lhê lủ? Nàng hap yu

é a nghut le gi, wó râ lúh? Nàng, hap yu é nghut le gi, a hap yu é đông haí mù nghutbùn nyi lê lúh?

<sup>8</sup> Nungmoq gi, râ é lhunglhang gumjup bang nghut bekô nhung! Nungmoq gi, wó bang dut gù nghut bekô nhung! Ngamoq a lom é za, nungmoq gi, hkohkam pé dut bekô nhung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lé, ngò hkâ-í yhang ô nau nyi lê ô!

<sup>9</sup> Nghut kôlhang, sat râ matú doqdan huí é shúm byú pé lé su, Garai Gasang gi, lagyô pé nghut é ngamoq lé de de kut htoq shit bê nghù, ngò wó myit ri. Ngamoq gi, nyi mi-nyì, joq mijoq, maumang lagyô pé eq waxâng zô wui é hí má, wú kùn jung đông dut nhang é huí nyi gù bê nghut lê. <sup>10</sup> Ngamoq gi, Hkrisduq é yanmai ngok é bang đông sôn yu é hui kôlhang, nungmoq kúm gi, Hkrisduq má hpaqchyí gyaí bo é bang đông dut bekô nhung! Ngamoq gi, wum nyhôm é bang đông sôn yu é hui kôlhang, nungmoq kúm gi, wúm bo é bang đông dut bekô nhung! Nungmoq gi, hkunggâ é huí akô; ngamoq kúm gi, hkunggâ é a hui nhung! <sup>11</sup> Shí hkyíng shí u jé shoq, ngamoq gi, zòmut wuìshit huí é, mebu ajeq amyhâ dut huí é, nhuq bat huí é, yhumsing é nyi jowò a wó é bang nghut nyi lê. <sup>12</sup> Ngamoq gi, yhumsing loq èq yhang mù zui wum kat nyi lê. Ngamoq gi, nhîng pyâm é hui jáng, shimân byi, zing-rî é hui jáng, jân pyám kut lê. <sup>13</sup> Ngamoq gi, lumù gansang é hui jáng, dang ngón dang nguí tû nyo lê. Ngamoq gi, ahkuí jé shoq, myidàm htoq mâ é hpoqkyuq hpoqpyâng eq mingkân é buzaq pé đông sôn yu é huí nyi lê.

<sup>14</sup> Ngò gi, nungmoq lé hoq lhoq hpu râ matú haú pé lé kâ é a nghut, ngá é chyitdap zo wuì lé đông lhoq pùn kying râ matú ru nghut lê. <sup>15</sup> Nungmoq gi, Hkrisduq má mhòqshit bang ra mun wó kô é nghut kôlhang, îwâ pé myo shoq wó

kô é a nghut; hkâsu mù gâ lé, ngò gi, haû gabú danglù dông mai, Hkrisduq Yesuq má nungmoq é îwa dut é nghut lhê. <sup>16</sup> Haû mù luî, ngò kut é su cháng keq nghû, ngò, nungmoq lé lung kat lhê. <sup>17</sup> Hau é yanmai, ngò gi, haû Yhumsîng má lhumsuz sù nghut é, ngò chytidap é ngá zo dông nghut sù Timohti lé, nungmoq chyáng nhang kat é nghut lhê. Yhang gi, Hkrisduq Yesuq mâ é ngá é asak duì hkyô lé, jowò hkangmó mâ é noqkuq hpúng hkangmó lé ngò mhoq byî é eq rajung za, nungmoq lé lhoq pun byi râ nghut lhê.

<sup>18</sup> Nungmoq mâ é ra-am gi, nungmoq chyáng ngò a dum jé lé râ su ngam pyám kômù, nghutbùn byuq bekô nghut ri. <sup>19</sup> Nghut kôlhang, haû Yhumsîng gyô é nghut jáng, ngò gi, nungmoq chyáng hân za jé lé râ nghut lhê; haú hkûn, ngò gi, nghutbùn é byù haú bang hái taî é hkyô lé za a nghut, yhangmoq hai a-tsam wó é hkyô lé le gôn htoq râ nghut lhê. <sup>20</sup> Hkâsu mù gâ le, Garai Gasâng é mingdán gi, taî é dang má bo é a nghut, a-tsam má sheq ru nghut lhê. <sup>21</sup> Nungmoq hká dông ô nau akô lhú? Ngò gi, nungmoq chyáng, nuichûm hkat èq, a nghut jáng, chytidap é eq nú-nhâm é myit mai lé lô ra râ lhú?

## 5

### *Ashop É Dông Gungsho Zùm Yap É Hkyô Kut É Sù Lé Lhoq Htoq Pyám Râ Hkyô*

<sup>1</sup> Nungmoq chyáng, ashop é dông gungsho zùm yap é hkyô joq é lé, hkyak taî hù lò bekô; haû gi, a lumjîng bâng chyáng lhang a dut wú é hkyô nghut é, yuqgè rayuq gi, yhangwâ é myiwe eq nyi zô lhâm nyi é hkyô nghut ri. <sup>2</sup> Nghut kôle, nungmoq gi, nghutbùn nyi bum akô nhung! Haú dông a nghut é za, nungmoq gi, yón é myit tân shit mù, haû su kut é byù lé, nungmoq é hpúng mai lhoq htoq pyâm le, a gè kó lhú? <sup>3</sup> Ngò gi, ngá gungdu, nungmoq eq rahá a nyi to kôlhang, ngá é i-myit gi, nungmoq eq rahá

nghut nyî luî, gungdu jé nyi tô é đông mai, haú hkyô kut é sủ lé jéyáng doqdan gù nghut lhê. <sup>4</sup> Nungmoq gi, nga-nhông é Yhumsîng Yesuq é myìng mai zup zing mù, ngá é i-myt gi, nungmoq eq rahá nghut nyî luî, nga-nhông é Yhumsîng Yesuq é a-tsam le, nungmoq eq rahá nghut nyi é hkûn, <sup>5</sup> byù haú yuq lé, Tsadán é loq má ap byî pyám keq.\* Haú jáng, Yhumsing é buinyì má, yhâng é woi-nyî gi, hkyi yu é hui râ matú, yhâng é yubak gungsho gi, lhoq htên pyâm é hui râ nghut lhê.

<sup>6</sup> Nungmoq é nghutbun hkyô gi, ge é a nghut. Mún† ra tsuí zo gi, muk long gón lé wó lhoq daú nhang é lé, nungmoq a sé kó l hú? <sup>7</sup> Nungmoq gi, múnchi a bo é bang nghut nyî kô é eq rajung za, múnchi a bo é muk htung asik su wó dut kô sháng gaq, múnchi axau lé lhuî pyám keq. Hkâsu mù gâ le, nga-nhông é Lhoqlhai Poî sauzo, Hkrisduq gi, hkungga nhong é hui bê nghut lhê. <sup>8</sup> Haú mù luî, nga-nhông gi, agè agaú hkyô eq hpuzo nhâng hkyô nghut é múnchi axau bo é đông a nghut é za, lhumzui hkyô eq tengmán hkyo é muk nghut é, múnchi a bo é muk eq, Poî haú lé kut nyî sháng.

<sup>9</sup> Ashop é đông gungsho zùm yap é bang eq hkâzûm kó nghû, ngò, nungmoq lé, ngá é laiká má kâ kat byi bê nghut lhê. <sup>10</sup> Nghut kôlhang, mingkan shî eq sêng é, ashop é đông gungsho zùm yap é bang, myoqnoq é bang, mhaú zô é bang eq hparà noq é bang lé hkâzûm yap kó nghû é gi, a nghut. Haú su ru nghut le gi, mingkan htoq shî mai nungmoq htoq ló byuq ra kô râ nghut lhê. <sup>11</sup> Nghut kôlhang, yhânggùng yhang gi, gumang ga kôle, ashop é

---

\* 5:5 Tsadán é loq má ap byî pyám keq gâ é gi, hpúng byû wui eq a zùm yap nhâng lo râ lé tái é nghut lhê. † 5:6 Mún gâ é gi, yubak mara lé tái nau é nghut lhê. Lhoqlhai Poî jé jáng, Israelaq byu pé gi, yhangmoq wó é múnchi banshoq lé lhuî pyám mù, múnchi a bo é muk saí kô é nghut lhê.

dông gungsho zùm yap é, myoqnoq é, hparà noq é, lumù gansang é, î shuq wut é, mhaú zô é sù ó yuq eq le a ge zùm yap kê râ nghut lê nghû, ahkuí, ngò, nungmoq lé kê kat nau é nghut lê. Haû sù é byù eq gi, rahá lhang hkâzo kó.

<sup>12</sup> Haû noqkuq hpúng shinggan mâ é bang lé jéyáng râ gi, ngò eq haî sêng lê lú? Nghut kôlhang, hpúng ahkaû mâ é bang lé nungmoq jéyáng râ dut lê. <sup>13</sup> Hpúng shinggan mâ é bang lé gi, Garai Gasang jéyáng râ nghut lê. Nghut kôlhang, "Haû agè agáu é sù lé, nungmoq chyáng mai lhoq htoq pyám keq." <sup>☆</sup> gâ tô ri.

## 6

### *Lumjúng Bâng Hkaû Má Jéyáng Lhùm É Hkyô*

<sup>1</sup> Nungmoq mâ é rayuq yuq gi, gumang góyuq eq dang-rhâng lhùm tô é nghut jáng, haû hkyô lé jéyáng nhâng râ matú, haû sân-yúng bâng é hí má taí râ malaî, Garai a wó bâng é hí má wám taí râ lú? <sup>2</sup> Haû sân-yúng bang gi, mingkan lé jéyáng râ nghut é hkyô lé, nungmoq a sé kó lú? Nungmoq gi, mingkan lé jéyáng râ bang nghut kôle nhîng, tiq é mù pé lé wó jéyáng é bang a nghut kó lú? <sup>3</sup> Nga-nhúng gi, maumâng pé lé jéyáng râ nghut é hkyô lé, nungmoq a sé kó lú? Haû mù, shí pyat mâ é hkyô pé lé, gè gè yhang wó jéyáng kê râ nghut lê ô! <sup>4</sup> Haû mù lú, nungmoq gi, dang-rhâng lhùm é mù pé joq é nghut jáng, noqkuq hpúng má ahkyak a nghut é bang lé tarâ agyì kut nhâng kê râ lú? <sup>5</sup> Ngò, haû su nghû taí é gi, nungmoq lé hoq hpu nhâng râ matú nghut lê. Lumjúng bâng chyáng dang-rhâng lhùm é hkyô lé wó jéyáng râ hpaqchyî luq shoq bo é byù, nungmoq chyáng rayuq lhang a nyì dut kê râ lú? <sup>6</sup> Nghut kôlhang, nungmoq gi, gumang yhangchang rayuq eq rayuq, a lumjúng bâng é hí má lhang rûng shok lhùm akô nhung!

---

<sup>☆</sup> 5:13 Tarâ Pun 17:7

<sup>7</sup> Nungmoq hkaû má mû jéyáng lhûm é hkyô joq é nghut jáng, nungmoq gi, sum lugù nghut bê. Góyuq èq shut le lháng rû ge lhê a nghut kô lú? Mhaú zô é huí le lháng rû gè lhê a nghut kô lú? <sup>8</sup> Nghut kôle, nungmoq yhang gi, mhaú zo kô é eq shut kô é nghut luí, haû gi, nungmoq é gumang wuì lé kut é nghut lhê.

<sup>9</sup> Agè agaú é bang gi, Garai Gasâng é mingdán mâ é shimân jeju a myang hkam yù kó râ nghut é hkyô lé, nungmoq a sé kó lú? Hkâ-nâ nyì kó. Ashop é đông gungsho zùm yap é bang le, hparà noq é bang le, sumyi sulàng lú é bang le, shiwa hpó kut é bang le, yuqgè yhangchang nyì zô lhûm é mara kut shut é bang le, <sup>10</sup> hkau bang le, myoqnoq bang le, î shuq wut bang le, lumù gansang é bang le, mhaú zô é bang le, Garai Gasâng é mingdán mâ é shimân jeju lé myang hkam yù kô râ a nghut. <sup>11</sup> Nungmoq mâ é ra-am gi, haû su kut kô é bang nghut akô. Nghut kôlhang, nungmoq gi, nga-nhûng é Garai Gasâng é Woi-nyí eq Yhumsîng Yesuq Hkrisduq é myìng mai, mara hkyut san byî é, lhoq sân-yúng é eq chí sân pyám byî é hui bekô nghut ri.

### *Ashop É Đông Gungsho Zùm Yap É Hkyô*

<sup>12</sup> "Jung hkangmó kut râ ahkáng ngò wó lhê." Nghut kôlhang, jung hkangmó gi, akyû byî é a nghut. "Jung hkangmó kut râ ahkáng ngò wó lhê." Nghut kôlhang, hái jûng èq le ngo lé wó sing pyám râ a nghut. <sup>13</sup> "Zoshuq gi, wamdaû é matú nghut mù, wamdaui gi, zoshuq é matú nghut ri." ga nungmoq ra-am taí kó râ nghut lhê. Nghut kôlhang, Garai Gasang gi, haû í jûng é lé lhoq htên pyám râ nghut lhê. Gungdu gi, ashop é đông gungsho zùm yap hkyo é matú a nghut é za, haû Yhumsing é matú nghut mù, haû Yhumsîng gi, gungdû é matú nghut ri. <sup>14</sup> Garai Gasang gi, Yhâng é a-tsâm èq, haû Yhumsîng lé, shi é mai

lhoq dui toq yû bê nghut mù, nga-nhúng lé le lhoq dui toq yû râ nghut lhê. <sup>15</sup> Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kô lhú? Haû nghut le nhîng, Hkrisduq é gungsho showui showang pé lé yû mù, shiwa myhî pé eq rading ralhum za kut pyám nhâng kô râ lhú? Hkâ-nhám le a ge dut nhâng! <sup>16</sup> Shiwa myhí eq gungsho zum é sù gi, yhang eq gungsho ralhum za dut bê hkyô lé, nungmoq a sé kô lhú? Hkâsu mù gâ le, "Yhangnhik gi, gungsho ralhum za dut kô râ nghut lhê."<sup>☆</sup> ga tâi tô ri. <sup>17</sup> Nghut kôlhang, haû Yhumsîng eq rading ralhum za dut é sù gi, woi-nyí má Yhang eq ralhum za dut bekô nghut ri.

<sup>18</sup> Ashop é dông gungsho zùm yap é hkyô lé koi pyám keq. Byù rayuq kut shut é gotû mara pé banshoq gi, yhâng é gungdu shinggan má nghut lhê; nghut kôlhang, ashop é dông gungsho zùm yap é hkyô kut shut é sù gi, yhumsîng gùng lé mara shut é sù nghut ri. <sup>19</sup> Nungmoq é gungdu gi, Garai Gasâng chyáng mai nungmoq wó yû bê nghut é, nungmoq má lúng nyi é Chyoiyúng Woi-nyí é noqkuq yhûm nghut é lé, nungmoq a sé kô lhú? Nungmoq gi, yhumsîng gùng lé sing é bang a nghut. <sup>20</sup> Hkâsu mù gâ le, nungmoq gi, ahpau ralhum byi mù wui hpyit tô é hui bê bang nghut akô. Haû mù luí, nungmoq é gungdû èq, Garai Gasang lé, hkunggâ é hkyô shit nyí keq.

## 7

*Myi Yu É Eq Sêng É Hkyô*

<sup>1</sup> Ahkuí, nungmoq kâ kat é hkyô pé eq séng luí ga jang, yuqgè rayuq gi, myi a yu le gè ri. <sup>2</sup> Nghut kôlhang, ashop é dông gungsho zùm yap é hkyô gyai myô é yanmai, yuqgè hkangmó gi, yhumsîng é myiwe wó râ lhê; myiwe hkangmó gi, yhumsîng é yuqgè wó râ lhê. <sup>3</sup> Haû yhumsîng

---

☆ 6:16 Apûn 2:24

hpó gi, wò joq é eq rajung za, yhâng yhumsîng myhí eq zùm sháng gaq; haú dông za, yhumsîng myhí le, yhâng yhumsîng hpó eq zùm sháng gaq. <sup>4</sup> Haú yhumsîng myhí é gungdu gi, yhânggùng yhang za sêng é a nghut, yhâng é yhumsîng hpó eq le sêng lhê. Haú eq rajung za, yhumsîng hpô é gungdu gi, yhânggùng yhang za sêng é a nghut, yhâng é yhumsîng myhí eq le sêng lhê. <sup>5</sup> Nungmoq myit huí lhum luí, kyûdùng é má rago ap nóng râ ahkýing ayoq za a nghut jáng gi, rayuq eq rayuq hkâhe lhum kó. Nungmoq yhumsing gùng lé a wó hkang é yanmai, Tsadán èq gunglaú é a hui kô sháng gaq, ahkýing ayoq haú lai jáng, rahá dum zùm keq. <sup>6</sup> Ngò, haú su nghû taí é gi, hkunmó hkyô é dông a nghut, ahkáng byî kat é dông ru nghut lhê. <sup>7</sup> Byù banshoq bang gi, ngò su nyí râ lé ô nau ri. Nghut kôlhâng, yuq hkangmó gi, ó le ô é chyunghuq lé Garai Gasâng chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

<sup>8</sup> Ahkuí, myiwe a yù lô é bang eq chuimó pé lé ngò taí kôlé, ngò su, haú dông jâng nyi pyám kô é nghut le, yhangmoq é matú ge é hkyô nghut ri. <sup>9</sup> Nghut kôlhâng, yhumsing gùng lé a wó hkâng kô é nghut le gi, yhangmoq, myi yû myi ló râ lhê; hkâsu mù gâ le, myi su nyé luí ô nau nyí râ malaí, myi yu myi ló le je ge lhê.

<sup>10</sup> Myi yû bê bang lé, ngò, hkunmó hkyó kôlé, shí gi, ngò dông hkyô é a nghut, Yhumsing chyáng mâ é ru nghut lhê: Yhumsîng myhí gi, yhâng é yhumsîng hpô chyáng mai a ge gang râ nghut lhê. <sup>11</sup> Nghut kôlhâng, yhang gâng é nghut jáng, myi a dum ló é za nyí râ lhê, haú a nghut jáng, yhâng é yhumsîng hpó eq dum xoq yû râ lhê. Yhumsîng hpó le, yhâng é yhumsîng myhí lé a ge kâng pyám râ nghut lhê.

<sup>12</sup> Góbang lé ngò shí su nghû taí kôlé, shí gi, Yhumsing



chyáng mâ é a nghut, ngò dông mai taí é ru nghut lhê. Gumang rayuq yuq gi, lumjínq sũ a nghut é yhumsínq myhí wó é nghut le, myiwe haũ, yhang eq rahá nyi nau é nghut jáng, yhang lé a ge kâng pyám râ nghut lhê. <sup>13</sup> Myiwe rayuq gi, lumjínq sũ a nghut é yhumsínq hpó wó é nghut le, yuqgè haũ, yhang eq rahá nyi nau é nghut jáng, yhang eq a ge gang râ nghut lhê. <sup>14</sup> Hkâsu mù gâ le, haũ a lumjínq sũ yhumsínq hpó gi, yhâng yhumsínq myhí dông mai lhoq sân-yúng é hui bê nghut mù, a lumjínq sũ yhumsínq myhí le, lumjínq sũ nghut é yhâng é yhumsínq hpó dông mai lhoq san lhoq yúng é hui bê nghut ri. Haũ a nghut jáng, nungmoq é zo wuĩ gi, a sanséng dut kô râ nghut lhê; nghut kôlhang, yhangmoq gi, haũ dông mai, chyoiyúng bekô nghut ri.

<sup>15</sup> Nghut kôlhang, haũ a lumjínq sũ gâng ló naũ jáng gi, gâng ló sháng gaq. Lumjínq é yuqgè nghut nghut, myiwe nghut nghut, haũ sũ é hkyô pé má gi, hkũm zing tô é hkyô a joq é nghut lhê. Garai Gasang gi, nga-nhúng lé, nguínqón shoq nyi sháng gaq ga ji yù bê nghut lhê. <sup>16</sup> Yhumsínq myhí ê, náng é yhumsínq hpó lé wó hkyi yù râ nghũ, hkâsu wó sé râ l hú? Yhumsínq hpó ê, náng é yhumsínq myhí lé wó hkyi yù râ nghũ, hkâsu wó sé râ l hú?

<sup>17</sup> Hká dông nghut kôlhang, yuq hkangmó gi, Garai Gasang, yhang lé ji yu tô é hkũn, haũ Yhumsínq mai yhang lé nyi nhang tô é dông asak dui nyi râ lhê. Haũ gi, noqkuq hpúnq pé banshoq má ngò tô to byĩ é tarâ nghut lhê. <sup>18</sup> Byù rayuq gi, ji yu é huĩ é hkũn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sũ dông a dut byuq sháng gaq. Byù rayuq gi, ji yu é huĩ é hkũn, ahpyo-kuq hpyit a hkam yu to shĩ é nghut jáng, ahpyo-kuq hpyit a hkam yù sháng gaq. <sup>19</sup> Ahpyo-kuq hpyit hkâm hkyô gi, haĩ ahkyak a nghut; ahpyo-kuq hpyit a hkâm hkyô gi, haĩ ahkyak a nghut. Garai Gasâng é hkunmó pé lé

châng nyi é za sheq ahkyak nghut lhê. <sup>20</sup> Yuq hkyô mó gi, yhang lé Garai Gasâng èq ji yu é hkûn lhê su xoq nyi nyi râ lhê. <sup>21</sup> Nàng gi, ji yù huî é hkûn jùn dut nyi é lhú? Haú hkyô lé hkâ-myit chiq. Nghut kôlhang, nàng gi, luthkyô wó yu é nghut jáng, haú dông nyi aq. <sup>22</sup> Hkâsu mù gâ le, haú Yhumsing èq ji yu é huî é hkûn, jùn dut nyi é sù gi, haú Yhumsing èq lhoq lhut yu é byù nghut bê. Haú eq rajung za, ji yu é huî é hkûn, luthkyô wó é sù gi, Hkrisduq é jùn nghut ri. <sup>23</sup> Nungmoq gi, Garai Gasâng èq ahpau byi mù wui hpyit yu é hui bê bang nghut akô. Haú mù, byu pê é jùn hkâdut kó. <sup>24</sup> Gumang wui ê, yuq hkyô mó gi, yhumsing lé Garai Gasâng èq ji yu é huî to bê dông, Yhâng é hí má xoq nyi nyi râ lhê.

<sup>25</sup> Ahkuî, zomyi zorâm wui é hkyô taí kôlé. Haú Yhumsing chyáng mâ é hkunmó gi, ngò a wó; nghut kôlhang, Yhumsing é shogyo nhikmyîn é yanmai, lumgíng sù rayuq nghut nyi é dông, ngò, nungmoq lé hkyô shit râ nghut lhê. <sup>26</sup> Ahkuî hui zô é wuîhke hkyô é yanmai, nungmoq gi, yhumsing nyi to é su xoq nyi nyi le je ge ri nghû, ngò wó myit ri. <sup>27</sup> Nàng, myiháng bê a nghut lhi? Lhoq kang râ hkâda lo. Nàng, myi a háng shi a nghut lhi? Myi hkâhô lo. <sup>28</sup> Nghut kôlhang, nàng, myihâng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlhang, myihâng é bang gi, shí pyat má wuîhke hkyô pé myo myo hui kó râ nghut mù, ngò, nungmoq lé haú mai hkyi yù nau ri.

<sup>29</sup> Gumang wui ê, ngò taí nau é lichyúm gi, ahkyíng tot byuq bê nghut mù, ahkuî mai, myi wó é bang gi, a wó é bang dông nyi kó sháng gaq.\* <sup>30</sup> Yón ngaú huî é bang gi, a huî é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su; <sup>31</sup> haú mingkan zè

---

\* <sup>29:29</sup> A wó é bang dông nyi kó sháng gaq gâ é gi, Garaî mù lé je myit zuq nyi sháng gâ naú é nghut lhê.

pé lé chung é bang gi, haú pé lé a myit tuí é bang su, nghut kó sháng gaq. Hkâsu mù gâ le, shí mingkân é ahkui lhê é azòng isâm gi, laí ló nyi é nghut lhê.

<sup>32</sup> Ngò gi, nungmoq lé a myit myo nhâng naù. Myi a yù shí é sù gi, haú Yhumsîng lé hkâsu wó gabú nhâng râ matú, haú Yhumsîng é muzó lé myit chiq nyi ri. <sup>33</sup> Nghut kôlhang, myi yû bê sù gi, yhâng é yhumsîng myhí lé hkâsu wó gabú nhâng râ matú, mingkan shi é muzó eq séng luí myit chiq nyi ri. <sup>34</sup> Haú mù, yhâng shirong é myit gi, byo myín nyi ri. Myi a ló é myiwe nghut nghut, zomyi gyíng nghut nghut gi, yhâng é gungdu eq woi-nyí má haú Yhumsîng lé rago wó ap nóng râ matú, Yhumsîng é muzó pé eq séng luí myit chiq nyi ri. Nghut kôlhang, myi ló bê myiwe gi, yhâng é yhumsîng hpó lé hkâsu wó gabú nhâng râ matú, mingkan shi é muzó eq séng luí myit chiq nyi ri. <sup>35</sup> Ngò, haú su nghû taí é gi, nungmoq é matú ge é hkyô nghut lhê; nungmoq lé tara èq zuí zing é a nghut é za, myit a byò lo shoq Yhumsîng lé wó ap nóng râ matú, jô é dông asak wó duí kô sháng gaq nghu é hkyô ru nghut lhê.

<sup>36</sup> Nghut kôlhang, rayuq yuq gi, yhang dúng tô é zomyi gyíng lé a htuk é dông kut nyi é su wó myit ngàm jáng, myiwe haú asak kô lo nyi mù, hâng yù râ dut bê nghû myit é nghut le gi, yhang ô nau é dông kut sháng gaq. Yhang mara kut é a nghut. Yhangnhik gi, hâng lhum râ lhê. <sup>37</sup> Nghut kôlhang, yhang gi, haú hkyô lé yhâng é myit mai wó lhoq zîm pyâm é nghut mù, yut yut ô nau hkyô é ahkaú má a nghut é za, yhumsîng ô nau é hkyô lé wó hkûm zing pyâm é sù nghut luí, haú zomyi gyíng lé a hâng yù râ matú wó myit hpyit bê sù nghut é nghut jáng, yhang gi, ge é hkyô kut bê nghut ri. <sup>38</sup> Haú mù luí, zomyi gyíng haú lé hâng yu é sù gi, jô é hkyô kut bê nghut ri; nghut kôlhang, zomyi gyíng haú lé a hâng yu é sù gi, je ge é hkyô kut bê nghut ri.

<sup>39</sup> Myiwe rayuq gi, yhang é yhumsîng hpó rû dui nyi nyi, yhang eq xoq tô ashî nghut lhê. Nghut kôlhang, yhang é yhumsîng hpó shi byuq é nghut jáng, yhang gi, myi ló râ ahkáng dum wó bê nghut lhê, nghut kôle, haú yuq gi, Yhumsîng eq sêng é sù dut râ lhê. <sup>40</sup> Ngò jéyáng é đông ga jáng, myi a dum ló é wó nyi le gi, yhang é matú je gabú hkyô dut râ nghut lhê. Ngò le, Garai Gasâng é Woi-nyí wó sù nghû wó myit ri.

## 8

### *Hparà Lhò Lé Tîng Byî É Zoshuq*

<sup>1</sup> Ahkuí, hparà lhò pé lé tîng byî é zoshuq hkyô: nga-nhúng banshoq bang gi, haú hkyô eq séng luí sê lhê. Sê é hkyô gi, nghutbun sê lhê; nghut kôlhang, chyitdap myit gi, lhoq kô myhang lhê. <sup>2</sup> Byù rayuq yuq gi, rajung jung lé sé bûn é nghut le, yhang sé âng é lé lhang a sé shi nghut ri. <sup>3</sup> Nghut kôlhang, Garai Gasang lé chyitdap é sù gi, Garai Gasâng èq sê é sù nghut ri.

<sup>4</sup> Haú mù luí, hparà lhò pé lé tîng byî é zoshuq lé zô é eq séng luí gi: hparà lhò gi, mingkan má haí lhang a nghut é hkyô lé le, Garai Gasang gi, Yhang rayuq mai lai luí gotû a nyi é lé le, nga-nhúng sê lhê. <sup>5</sup> Hkâsu mù gâ le, mauhkûng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsing pé" myo myo nyi kôlhang <sup>6</sup> nga-nhúng é matú gi, Îwa nghut é Garai Gasang rayuq za nyi é nghut mù, lhunglhang gi, Yhang mai hpan é nghut luí, nga-nhúng gi, Yhang é matú asak dui nyi é nghut lhê. Yesuq Hkrisduq nghu é Yhumsîng rayuq za nyi é nghut mù, lhunglhang gi, Yhang đông mai hpan é nghut luí, nga-nhúng gi, Yhang đông mai asak dui nyi é nghut lhê.

<sup>7</sup> Nghut kôlhang, yuq hkgámó gi, haú hkyô lé sê gam hkoq yu é a nghut. Ra-am gi, ahkuí jé shoq hparà lhò pé

má mán byuq kô é yanmai, haû sù é zoshuq lé yhangmoq zô é hkûn, hparà lhô lé tîng byî é zoshuq dông myit sôn yu akô. Yhangmoq myit sôn sê é hkyô wum nyhôm é yanmai, mara wó bûn akô nghut ri. <sup>8</sup> Nghut kôlhang, zoshuq gi, nga-nhúng lé, Garai Gasâng shut shuî chyâng e é a nghut. Nga-nhúng a zô é nghut le gi, je sôm byuq lô é a nghut, zô é nghut le gi, je ge lo é a nghut.

<sup>9</sup> Haû su ga kôlhang, nungmoq a htung a htê zô é hkyô gi, lumjîng myit wum nyhóm bâng é matú myit leqbat jowò a dut shoq sidiq keq. <sup>10</sup> Hkâsu mù gâ le, sumsé hpaqchyî wó é bang nungmoq gi, hparà lho é noqkuq yhûm má zô nyî kô é lé, haû myit sôn sê é hkyô má wum nyhôm é sù rayuq yuq myang é nghut jáng, hparà lhô pé lé tîng byî é zoshuq lé, yhang wám zo râ lé wum byî é a dut kó râ lú? <sup>11</sup> Haû mù, Hkrisduq shî hkám byi bê nghut é, wum nyhôm é gumang hpó haû yuq gi, nungmoq é sumsé hpaqchyî eq lhoq htên pyâm é hui berâ nghut lhê. <sup>12</sup> Nungmoq gi, haû hkyô dông mai, nungmoq é gumang wuî lé mara kut shut é eq, yhangmoq é myit sôn sê é hkyô wum nyhôm é lé nò nhang é hkûn, Hkrisduq lé mara kut shut é nghut bekô. <sup>13</sup> Haû mù luî, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhám le, sho lé a zo lo râ nghut lhê.

## 9

### *Lagyo Rayuq É Ahko Ahkáng*

<sup>1</sup> Ngò gi, lut sù a nghut lú? Ngò gi, lagyo rayuq, a nghut lú? Ngò gi, nga-nhông é Yhumsîng Yesuq lé myang wú bê sù, a nghut lú? Nungmoq gi, haû Yhumsîng má, ngò zui saî é muzó é ashi pé chyat, a nghut kô lú? <sup>2</sup> Ngò gi, góbâng chyáng lagyo a nghut kôlhang, nungmoq chyáng gè gè nghut lhê! Hkâsu mù gâ le, nungmoq gi, haû

Yhumsîng má, ngò lagyo nghut é hkyô saksé dizik nghut bum akô.

<sup>3</sup> Ngá ahtoq má jéyáng bang lé, ngá gûng ngò tâi hung kat kôlé. <sup>4</sup> Ngamoq gi, zo râ shuq râ ahko ahkáng a wó é bang nghut lhê lhú? <sup>5</sup> Gotû lagyo pé eq Yesuq é yhanggu yuqzô pé eq Kehpa kut é su, lumjîng sû nghut é yhumsîng myhí shuî chûng râ, ngamoq, ahko ahkáng a wó é nghut lhê lhú? <sup>6</sup> Ngò eq Barnaba baú za, asak duì hkyo é matú mû zui ra râ lhú?

<sup>7</sup> Ó yuq wá, yhumsing zoshuq wùn luî, gyè mû wùn waq râ lhú? Ó yuq wá, tsibiyiq hkyâm saí mù, haú mâ é tsibiyiq shi a zo kut râ lhú? Ó yuq wá, sau rém mù, sau naú a shuq kut râ lhú? <sup>8</sup> Ngò gi, shí hkyô pé lé xângzo hkyam dông za tâi é nghut lhê lhú? Haú tarâ má le, rajung za tâi tô lhê, a nghut lhú? <sup>9</sup> Hkâsu mù gâ le, haú Mosheq é tarâ má, "Guq nâng nyi é no lé nhuttsung hkâ-tsûng to byi."☆ ga kê tô ri. Garai Gasang gi, no eq séng luî za chiq é nghut lhê lhú? <sup>10</sup> Gè gè yhang, yhang gi, nga-nhûng é matú tâi é a nghut kô lhú? Nghut lhê, haú gi, nga-nhûng é matú kê to byî é nghut lhê. Haú mù gâ le, yò hpuq sû, yò hpuq é eq, guq bat sû, guq bat é gi, kyô chôm shû yù râ lé myoqbyù luî, kut kô é nghut lhê. <sup>11</sup> Ngamoq gi, nungmoq chyáng woi-nyí amyui sân kat bê nghut mù, nungmoq chyáng mâ é mingkan zè lé shû yu é nghut jáng, lûm myô é dut byuq bekô lhú? <sup>12</sup> Góbang gi, nungmoq chyáng mai garúm é ahko ahkáng wó kô é nghut jáng, ngamoq gi, haú lé je wó râ lhê a nghut kô lhú?

Nghut kôlháng, ngamoq gi, ahko ahkáng haú lé a yu é nghut lhê. Haú yù râ malaî, Hkrisduq é gabú danglù gi, hkûm zing pyâm é a hui râ matú sheq, jung hkangmó lé ngamoq hkam jân nyi lhê. <sup>13</sup> Haú noqkuq yhûm má mû zuí é bang gi, yhangmoq é zoshuq lé haú noqkuq yhûm

☆ 9:9 Tarâ Pun 25:4

mai wó é hkyô eq, hkungga gyap má dojaú é bang gi, hkungga gyap má nhông byi é ra-am lé myàng zô é hkyô lé, nungmoq a sé kê lú? <sup>14</sup> Haú eq rajung za, gabú danglù hko kyô é bang gi, gabú danglù hkyô mai yhangmoq é asak baú râ lê ga, haú Yhumsing hkunmó hkyô to bê nghut ri.

<sup>15</sup> Nghut kôlhang, ngò gi, ahko ahkáng haú pé haí lé le a yu é nghut lê. Nungmoq, ngo lé haú su lhom kut byi râ lé myoqbyù mù, ngò, shí hkyô lé kê é a nghut. Hkâsu mù gâ le, ngò haú su gumrong é hkyô lé, rayuq yuq lhoq htên pyám byi râ htoq má, ngò shi byuq le lhang je ge ri.

<sup>16</sup> Nghut kôlhang, gabú danglù lé ngò hko kyô é hkûn, ngò gumrông jang a joq; hkâsu mù gâ le, haú gi, ngò a kut a ge é ngá wô nghut lê. Haú gabú danglù lé ngò a hko kyô é nghut le gi, ngò dingnyé wó râ nghut lê. <sup>17</sup> Yhumsing nau é myit mai ngò hko é nghut jáng, shigyaú chyunghuq wó râ nghut lê; yhumsing nau é myit mai a nghut jáng gi, ngo lé lùm luí ap tô é lé, agon za wùn waq nyi é dut râ nghut lê. <sup>18</sup> Haú mù luí, ngá é shigyaú chyunghuq gi, haí nghut lê lú ga jang, haú gabú danglù lé hko kyô é hkûn, ngò gi, ahpau a yu é za wó ap nóng luí, gabú danglù hko kyo hkyô mâ é ngá é ahko ahkáng pé lé ngò a yu é amyat nghut lê.

<sup>19</sup> Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gûng ngò, yuq hkangmó é jùn kut nyi lê. <sup>20</sup> Ngò gi, Yudaq byu pé lé shuí lhing yù râ matú, Yudaq byu pê chyáng nghut nyi é hkûn, Yudaq byù rayuq đông dut nyi lê. Ngò gi, tarâ hkaú má nyi sù a nghut kôlhang, tarâ hkaú mâ é bang lé shuí lhing yù râ matú, tarâ hkaú má nyi bâng chyáng nghut nyi é hkûn, tarâ hkaú mâ é byù rayuq đông dut nyi lê. <sup>21</sup> Ngò gi, tarâ a wó bang lé shuí lhing yù râ matú, tarâ a wó bâng chyáng nghut nyi é hkûn, tarâ a wó sù rayuq đông dut nyi lê. Nghut kôlhang, gè gè ga jáng,

Garai Gasâng é tarâ mai a lut htoq é za, Hkrisduq é tarâ hkaû má nyi sù nghut lhê. <sup>22</sup> Ngò gi, wum nyhóm bang lé shuí lhing yù râ matú, wum nyhóm bang chyáng nghut nyi é hkûn, wum nyhóm sù rayuq đông dut nyi lhê. Ngò gi, wó dut é hkyô đông mai byù ra-am lé wó hkyî sháng gaq nghû, byù lhunglhang bang chyáng, byù ajà jà đông nyi nyi lhê. <sup>23</sup> Ngò gi, gabú danglù mai wó é shimân jeju pé lé wó chôm hkam yù sháng gaq nghû, gabú danglù é yanmai haú pé banshoq lé kut é nghut lhê.

<sup>24</sup> Din shingjóng poî má đìn râ bang banshoq đìn kôlhang, rayuq za shigyaú chyunghuq wó é hkyô lé, nungmoq a sé kô lhu? Chyunghuq wó râ matú đìn keq. <sup>25</sup> Sup poî má shingjóng lhâm é bang yuq hkangmó gi, yhumsing gùng yhumsing tarâ htan é đông lhoq mhân yù râ lhê. Yhangmoq gi, gîng nyi râ a nghut é janmaú wó râ matú, haú su kut é nghut akô; nghut kôlhang, nga-nhung gi, ahtum abyuq gingtîng nyi râ nghut é janmaú wó râ matú shikut é nghut lhê. <sup>26</sup> Haú mù luí, ngò gi, jum đìn đìn é byù rayuq su đìn é sù a nghut. Ngò gi, lài lé bat é byù rayuq su, akôm má bat é sù le a nghut. <sup>27</sup> Ngò gi, góbâng chyáng mungdang hko é htâng má, ngá gûng ngò, shigyaú chyunghuq eq a gingdán sù a dut sháng gaq nghû, ngá gûng lé gyai yhang lhoq mhân yù mù, ngá gung lé jùn kut yu nyi lhê.

## 10

### *Israellaq Pê É Labaû Mai Sidiq Byê É Hkyô*

<sup>1</sup> Gumang wuì ê, ngò gi, dut lái lo é hkyô lé, nungmoq lé a sé a dut nhâng nau é nghut lhê; hí hkûn, nga-nhung é íchýi îwa pé banshoq bang gi, mhutdûm ô má nyi mù,



Nhông Nè mai wó lâi byit kô é nghut lhê.\* <sup>2</sup> Yhangmoq banshoq bang gi, mhutdûm eq Nhông Nè má, Mosheq é chángzô pé dông baptisma hkam yu é bang chyat nghut bekô. <sup>3</sup> Yhangmoq banshoq bang gi, rajung zâ é woi-nyí zang zo kô é eq, <sup>4</sup> rajung zâ é woi-nyí wui shuq kô é nghut lhê; hkâsu mù gâ le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó haû gi, Hkrisduq nghut bê. <sup>5</sup> Nghut kôhang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhîn so san kut pyâm é hui bekô nghut ri.

<sup>6</sup> Haû hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyi râ matú nga-nhúng é azòng dut bê nghut ri. <sup>7</sup> "Byu pé gi, zùng mù, zo luí shuq luí, a lumjínq bang kut é dông, toq mù, ye bum akô."☆ ga kê tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kó. <sup>8</sup> Yhangmoq mâ é ra-am gi, ashop é dông gungsho zùm yap é hkyô shut kômù, ra-nyí má za í mûn sum hkyîng yuq shi byuq é su, ashop é dông gungsho zùm yap é hkyô le, nga-nhúng gi, a ge kut shut râ nghut lhê. <sup>9</sup> Yhangmoq mâ é ra-am gi, haû Yhumsîng lé chyâm luí, lhangmuì pé èq hte sat é huí bùm kô é su, haû Yhumsîng lé, nga-nhúng gi, a ge chyâm râ nghut lhê. <sup>10</sup> Yhangmoq mâ é ra-am gi, nhutluq shô-myo kôluí, lhoq htên é maumâng èq sat pyâm é hui kô é su, nungmoq gi, nhutluq shô-myo hkâkut kó.

<sup>11</sup> Yhangmoq chyáng wú yû râ azòng dông haû pé dut htoq luí, lô htáng râ ipyat pé má nyi âng to bang nga-nhúng é matú sidiq byi râ dông kê to bê nghut ri. <sup>12</sup> Haû mù luí, nungmoq gi, yap gîng nyi bê su ngàm kô é nghut

\* 10:1 Bun zo ralhûm mai raxê lhûm gi, Htoq Lô Laiká má bo é Mosheq htâng cháng bâng é hkyô lé kê tô é nghut lhê. ☆ 10:7 Htoq Lô 32:6

jáng, a leqbat râ matú sidiq nyì keq! <sup>13</sup> Byu chyáng htoq sê é gunglaú hkyô za nungmoq hui râ nghut lhê. Garai Gasang gi, lhumzui sù nghut lhê mù, nungmoq a wó jân é gunglaú hkyô lé hui nhâng râ a nghut. Nghut kôlhang, nungmoq gunglaú huì é hkûn, Yhang gi, haù lé nungmoq wó jan râ matú, hkyô htong byi râ nghut lhê.

### *Hparà Lhô Noq Hkyô Lé Koi Pyám Râ Hkyô*

<sup>14</sup> Haù mù luì, ngò chyitdap é luzúm wuì ê, hparà lhô noq hkyô lé koi pyám keq. <sup>15</sup> Nhik gyng bang lé ngò tái lhê; ngò haì tái nyi é hkyô lé nungmoq gùng myit sôn yù keq. <sup>16</sup> Nga-nhúng, jeju bûn nyi é jeju góm lé shuq é hkûn, Hkrisduq é sui má chôm zùm bê a nghut kó lú? Nga-nhúng, myhik hpê é muk lé zô é hkûn, Hkrisduq é gungdu má chôm zùm bê a nghut kô lú? <sup>17</sup> Haù mù gà le, muk htung rallhum za nghut mù, nga-nhúng gi, myo myo nghut kôle ragùng za nghut nyi lhê. Hkâsu mù gà le, nga-nhúng banshoq bang gi, haù rahtung zâ é muk lé chôm gàm zô é bang chyat nghut lhê.

<sup>18</sup> Israellaq byu pê é hkyô lé myit wú keq. Haù hkungga lé zô é bang gi, hkungga gyap má chôm lom é bang nghut lhê, a nghut kó lú? <sup>19</sup> Hparà lhô, a nghut jáng, hparà lhô lé títng byì é hkungga gi, rajung jung nghut lhê nghû, ngò tái é lú? <sup>20</sup> Haù su tái é a nghut, a lumjítng bâng é hkungga gi, Garai Gasang lé nhông byì é a nghut, nat gâng pé lé títng byì é ru nghut lhê. Ngò gi, nungmoq, nat gâng pé eq chôm zum nyì bang dut râ lé a ô nau é nghut lhê. <sup>21</sup> Nungmoq gi, haù Yhumsing é góm lé le, nat gâng pê é góm lé le, ge shuq râ a nghut; nungmoq gi, haù Yhumsing é zangbó má le, nat gâng pê é zangbó má le, rahá ge bo lòm râ a nghut. <sup>22</sup> Nga-nhúng gi, haù Yhumsing lé manôn nhâng nau é bang dut râ a nghut kô lú? Nga-nhúng gi, Yhâng htoq je wúm bo é bang nghut lhê lú?

*Lumjínq Su É Luthkyô*

<sup>23</sup> "Jung hkanqmó kut râ ahkáng wó lhê." nghut kôlhang, jung hkanqmó gi, akyû wó é a nghut. "Jung hkanqmó kut râ ahkáng wó lhê." nghut kôlhang, jung hkanqmó gi, byù lé wó kô làm nhang é a nghut.† <sup>24</sup> Ó yuq le, yhumsing é gè hkyo matú ho é a nghut é za, góbâng é gè hkyo é matú hô râ dut lhê.

<sup>25</sup> Sho ûng gai má ûng é haî lé lé, úng-âng é myit èq a myî gôn é za zo keq. <sup>26</sup> Hkâsu mù gâ le, "Myidàm htoq eq haú má joq é jung hkanqmó gi, Yhumsing é chyat nghut lhê."☆ gâ tô ri.

<sup>27</sup> A lumjínq bang ra-am, nungmoq lé zang zo jì mù, nungmoq ê nau é nghut jáng, úng-âng é myit èq a myî gôn é za, nungmoq hí má to byî é gû lé zo keq. <sup>28</sup> Nghut kôlhang, rayuq yuq, nungmoq lé, "Shî gi, hparà lhô lé tîng byi bê nghut lhê." ga taî kyô é nghut jáng, nungmoq lé taî kyo su é yanmai le, myit úng-âng é yanmai le, haú lé hkâzo kó. <sup>29</sup> Úng-âng é myit haû gi, nungmoq é a nghut, góyuq é úng-âng é myit lé taî nau é ru nghut lhê. Ngá é luthkyô lé, haî mù góyuq é úng-âng é myit èq jéyáng é huí nhang lhê lhú? <sup>30</sup> Ngò jeju bûn é myit mai bo zo bo shuq yu é nghut jáng, Garai Gasang lé jeju hkya-on bê nghut é zoshuq hau é yanmai, haî mù lumu pyâm é ngò hui râ lhú?

<sup>31</sup> Haû mù luî, nungmoq zo kôlhang, shuq kôlhang, haî kut kôlhang, Garai Gasâng é hpungwup shingkâng é matú chyat kut keq. <sup>32</sup> Ngò gi, yuq hkanqmó lé, hkyô hkanqmó má shikut luî myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasâng é noqkuq hpúng mâ é byù lé nghut nghut, ó yuq lé le myit hkâleqbat nhâng kó. <sup>33</sup> Hkâsu mù

---

† 10:23 Bun zo 23 mâ é dangnggho gi, Korinhtuq byu pé lhaq taî é dang nghut lhê. ☆ 10:26 Hkya-on 24:1

gâ le, ngò gi, yhangmoq hkyi yu é wó hui kó sháng gaq  
ngô, ngá é gè hkyô ho é a nghut é za, myo myô é matú  
gè hkyô ho nyi é ru nghut lê.

## 11

<sup>1</sup> Ngò gi, Hkrisduq é alik châng é su, nungmoq gi, ngá é  
alik cháng keq.

### *Noqkuq É Má Htap Htuk Râ Hkyô*

<sup>2</sup> Nungmoq gi, hkyô hkanmó má ngo lé bûn nyi kô é  
yanmai le, nungmoq lé ngò hai byi bê mhoqshit hkyô pé  
lé myhik zing nyi kô é yanmai le, ngò, nungmoq lé hkyâ-  
ôn lê.

<sup>3</sup> Ahkuî, ngò, nungmoq lé sê hkyâng nhâng nau é hkyô  
gi: yuqgè hkanmó é ulhum gi, Hkrisduq nghut ri; myiwe  
hkanmó é ulhum gi, yuqgè nghut ri; Hkrisduq é ulhum  
kúm gi, Garai Gasang nghut ri. <sup>4</sup> Yuqgè hkanmó gi,  
kyûdûng le nghut nghut, myiqhtoi htoî le nghut nghut,  
yhâng é ulhum lé nghop tô é nghut jáng, yhâng é ulhûm é  
aróng lé lhoq hpoî pyâm é nghut bê. <sup>5</sup> Myiwe hkanmó gi,  
kyûdûng le nghut nghut, myiqhtoi htoî le nghut nghut,  
yhâng é ulhum lé a nghop tô é nghut jáng, yhâng é ulhûm  
é aróng lé lhoq hpoî pyâm é nghut bê. Haû gi, yhâng  
é ulhum lé wuq pyâm é eq rajung za nghut ri. <sup>6</sup> Myiwe  
rayuq gi, yhâng é ulhum lé a nghop pyâm é nghut jáng,  
yhâng é xâm lé nyhâm pyám ra râ nghut lê. Nghut  
kôlhang, xâm nyhâm pyâm é nghut nghut, xâm wuq pyâm  
é nghut nghut, myiwe rayuq é matú aróng hpoî lê nghut  
jáng, yhang gi, yhâng é ulhum lé nghop to ra râ nghut  
lê. <sup>7</sup> Yuqgè gi, Garai Gasâng é azông isâm eq hpungwup  
shingkang nghut é yanmai, yhâng é ulhum lé a nghop râ é  
nghut lê. Myiwe kúm gi, yuqge é hpungwup shingkang  
nghut ri. <sup>8</sup> Hkâsu mù gâ le, a-nham sâng-hi má, yuqgè gi,  
myiwe mai lo é a nghut, myiwe sheq yuqgè mai lo é ru

nghut lhê. <sup>9</sup> Hau htoq agó, yuqgè lé gi, myiwe é matú hpan tô é a nghut, myiwe lé sheq, yuqge é matú hpan tô é ru nghut lhê. <sup>10</sup> Haû nghut é yanmai le, maumang lagyo pê é yanmai le, myiwe gi, ahko ahkáng kumlhá đông yhâng é ulhum lé nghop râ dut lhê.

<sup>11</sup> Nghut kôlhang, haû Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê. <sup>12</sup> Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhang, jung hkangmó gi, Garai Gasang mai lo é nghut lhê. <sup>13</sup> Myiwe rayuq, ulhum a nghop é za Garai Gasang lé kyûdông é gi, htuk kô râ l hú? Nungmoq, yhumsing gung é matú doqdân yù keq. <sup>14</sup> Yuqgè xâm hîng tô é nghut jáng, yhâng é matú aróng hpoi é hkyô dut é nghut kôle, <sup>15</sup> myiwe xâm hîng tô é nghut jáng, yhâng é matú hpungwup shingkang nghut é hkyô lé, htûnglî éq nungmoq lé mhoqshit lhê, a nghut kô l hú? Hkâsu mù gâ le, xâm hîng tô é gi, nghop râ zè đông yhang lé byî tô é nghut lhê. <sup>16</sup> Rayuq yuq, haû hkyô lé tai dang-rháng nau é nghut jáng, ngamoq chyáng le, Garai Gasâng é noqkuq hpûng pê chyáng le, gotû htûngli a joq é nghut lhê.

### *Yhumsing É Myinzang*

<sup>17</sup> Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut. <sup>18</sup> Sâng-hi má, noqkuq hpúng ralhum đông nungmoq zup zîng é hkûn, nungmoq hkaû má gam hkoq hkyô joq é lé wó gyô é nghut lúi, têng é le bò râ nghû, ngò lumjîng lhê. <sup>19</sup> Ô pé gi, Garai Gasang o é hkyam shut nghut é lé wó shit râ matú, nungmoq ahkaû má gam hkoq lhum hkyô joq râ dut lhê. <sup>20</sup> Nungmoq rahá zup zîng kô é hkûn, nungmoq gi, haû

☆ 11:8 Apûn 2:21-23

Yhumsing é myinzang zô é a nghut kó. <sup>21</sup> Hkâsu mù gâ le, nungmoq zô é hkûn, góyuq lé le a lánq é za, ó le ó hí yù zô akô. Haû mù, rayuq gi, zo mut huí nyì, góyuq gi, shuq wut to dut akô nghut ri. <sup>22</sup> Nungmoq gi, zo jang shuq jang yhûm a wó bang nghut akô lhú? Garai Gasâng é noqkuq hpúng lé wú tiq pyám kô é eq, a wó bang lé hoq hpu nhâng kô é, nghut akô lhú? Nungmoq lé ngò hkâsu nghû taí kó râ lhú? Haú pê é yanmai, ngò, nungmoq lé hkya-on râ lhú? Ratsuí lháng a wó dut!

<sup>23</sup> Hkâsu mù gâ le, haû Yhumsing chyáng mai ngò wó hap yu é gû lé, nungmoq lé lhai byi bê nghut lhê: Haû Yhumsing Yesuq gi, Yhang lé ap pyám huí é myin má, muk lé yù mù, <sup>24</sup> jeju hkya-ôn é htâng má, haû lé myhik hpé mù, taí é gi, "Shî gi, nungmoq é matú Ngá é gungsho nghut lhê; Ngo lé bûn nyì râ matú, shî su kut nyî keq." gâ ri. <sup>25</sup> Haû eq rajung za, myinzang bàn zô é htâng má, Yhang gi, góm lé le yù mù, "Góm shî gi, Ngá é sui mâ é dangshikaq asik nghut lhê; hkâ-nhám le, nungmoq shî shuq é hkûn, Ngo lé bûn nyì râ matú shî su kut keq." gâ taí ri. <sup>26</sup> Hkâsu mù gâ le, nungmoq gi, muk shî lé zo luí, góm shî lé shuq é hkangmó, haû Yhumsing shî hkâm é hkyô lé, Yhang jé lé shoq, shit kyô nyì râ lhê.

<sup>27</sup> Haû mù luí, ó yuq nghut kôle, a gingdán é đông Yhumsing é muk haû lé zo mù, góm haû lé shuq é nghut jáng, haû Yhumsing é gungdu eq sui lé shut é mara wó bê nghut lhê. <sup>28</sup> Haû mù, ó yuq le, muk zo góm shuq râ hí má, yhumsing gùng yhumsing jep wú ra râ nghut lhê. <sup>29</sup> Hkâsu mù gâ le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhânggùng yhang mara zô bô shuq bo yu é nghut lhê. <sup>30</sup> Haû nghut é yanmai, nungmoq mâ é byù myo myo gi, wum nyhôm é, nõhpyo huí é nghut bum akô. Ra-am gi, shi ló byuq bekô nghut ri. <sup>31</sup> Nghut kôlhang, nga-nhúng

gi, yhumsing gùng yhumsîng hí sôn sê yu é nghut jáng tarâ jéyáng é hui râ a nghut. <sup>32</sup> Nga-nhúng gi, mingkan eq rahá, mara byî é a hui zo sháng gaq ga, nga-nhúng lé haû Yhumsing èq jéyáng é hkûn, nga-nhúng gi, mhoqshit é huî nyî gù bê nghut lhê.

<sup>33</sup> Haû mù luî, ngá é gumang wuî ê, nungmoq gi, zo râ nghû rahá zup zîng é hkûn, rayuq eq rayuq lánq lhum keq. <sup>34</sup> Nungmoq rahá zup zîng é hkûn, jéyáng é a hui zo kó sháng gaq, rayuq yuq zòmút é nghut jáng, yhûm má zô chûng râ lhê.

Gotû myit tô é hkyô pé gi, ngò jé lé é hkûn sheq shit kyo râ nghut lhê.

## 12

### *Woi-nyí Hkyô Eq Sêng É Chyunghuq Pé*

<sup>1</sup> Gumang wuî ê, woi-nyí hkyô eq sêng é chyunghuq pé lé, nungmoq a sê gyo râ lé ngò a ô nau é nghut lhê.

<sup>2</sup> Nungmoq gi, a lumjîng bang nghut nyî kô é hkûn lé, dang a nyo é hparà lhô noq râ matú hkyô shuî nghoq é hui kô é hkyô lé, nungmoq sê lhê. <sup>3</sup> Haû mù luî, "Yesuq gi, nhîng pyâm é hui sháng gaq." ga, Garai Gasâng é Woi-nyí mai taí é byù ó yuq le a nyi é eq, haû Chyoiyúng Woi-nyí mai za a nghut jáng, "Yesuq gi, Yhumsîng nghut lhê." ga, ó yuq le a wó taí é nghut lhê nghû, ngò, nungmoq lé taí kyô é nghut lhê.

<sup>4</sup> Woi-nyí hkyô eq sêng é chyunghuq ajung jung joq lhê; nghut kôlhang, Chyoiyúng Woi-nyí mai chyat nghut lhê. <sup>5</sup> Dojaú é hkyô ajung jung joq lhê; nghut kôlhang, Yhumsîng rayuq lé za dojaú é nghut lhê. <sup>6</sup> Zui saí é hkyô ajung jung joq lhê, nghut kôlhang, Garai Gasang yhang za, byù lhunglhang bang má, haû pé banshoq lé kut é nghut lhê.

<sup>7</sup> Woi-nyí é hpông shit hkyô gi, byù pê é gè hkyô matú, yuq hkanmó lé byi bê nghut ri. <sup>8</sup> Rayuq lé gi, Woi-nyí haú mai, hpaqchyí byéng-yá byíng é danglù byí é nghut ri; góyuq lé gi, Woi-nyí hau èq za, sumsé hpaqchyí byíng é danglù byí é nghut ri; <sup>9</sup> góyuq lé gi, Woi-nyí hau èq, lumjíng myit byí é nghut ri; dum góyuq lé gi, Woi-nyí hau èq, nò lhoq ge é chyunghuq byí é nghut ri; <sup>10</sup> dum, góyuq lé gi, hpungwup a-tsam pé; dum, góyuq lé gi, myiqhtoi htoi é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haú pê é lichyúm taí sân kyô é ahkáng, byí é nghut ri. <sup>11</sup> Chyunghuq haú pé banshoq gi, Woi-nyí hau èq za kut é loqmú chyat nghut mù, Yhang myit hpyit é dông yuq hkanmó lé haú pé tsing gàm byí é nghut ri.

### *Gungbun Myo Kôlhang, Ra Gùng Za*

<sup>12</sup> Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haú eq rajung za, Hkrisduq eq le haú dông nghut ri. <sup>13</sup> Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yù bê bang nghut lhê.

<sup>14</sup> Haú gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê. <sup>15</sup> Haú hkyí gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. <sup>16</sup> Dum, haú nohkyap gi, "Ngò, myoqjí a nghut é yanmai, gungdu eq a sêng é



nghut lhê." gâ é nghut jáng, hau é yanmai, gungdu eq a séng wó dut é a nghut. <sup>17</sup> Ragùng dû é gi, myoqjí za nghut é nghut jáng, gyô é hkyô gi, hkâmá nghut râ l hú? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ l hú? <sup>18</sup> Nghut kôlhang, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri. <sup>19</sup> Gungsho showui showang gi, ra bun za nghut é nghut jáng, gungdu gi, hkâmá nghut râ l hú? <sup>20</sup> Hkyak ga jang, gungsho showui showang pé myo kôlhang, gungdu gi, ragùng za nghut ri.

<sup>21</sup> Haû myoqjí gi, loq lé, "Ngò, nang lé a ra!" nghû a ge taí. Haû ulhum gi, hkyí lé, "Ngò, nang lé a ra!" nghû a ge taí. <sup>22</sup> Haû za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lhê. <sup>23</sup> Hau htoq agó, hpau a lûm tap râ su myit ngam é gungsho showui showang pé lé, nga-nhúng je hpautap râ lhê. Haû a shit é jung gungsho pé lé, nga-nhúng hpautap é dông rago nghop râ lhê. <sup>24</sup> Nga-nhúng é wó shit é gungsho pé kúm gi, haû hkyô a ra nghut ri. Nghut kôlhang, Garai Gasang gi, gungdû é gungsho showui showang pé lé pong to mù, aróng nyhum é lé, je riyhang aróng byi bê nghut ri. <sup>25</sup> Haû mù, gungdu má gamhkuî lhûm é hkyô a bo é za, gungsho showui showang pé ralhum eq ralhum, rajung za kut wó myit tê byî lhum kó râ nghut lhê. <sup>26</sup> Haû gungsho showui showang ralhum jamjau huî é nghut jáng, lhum hkangmó bo jamjau râ nghut lhê. Ralhum hpautap huî é nghut jáng, lhum hkangmó bo gabú é nghut lhê.

<sup>27</sup> Ahkuî, nungmoq gi, Hkrisduq é gungdu nghut kôluî, nungmoq yuq hkangmó gi, haû é gungsho showui showang pé nghut akô. <sup>28</sup> Garai Gasang gi, noqkuq hpúng má, sâng-hi lé, lagyô pé, í lhum nghû râ má, myiqhtoí

pé, sôm lhum nghû râ má, mhoqshit bang, hau htâng má, laklaí kumlhá pé kut râ bang, nò wó lhoq gê râ chyunghuq wó é bang lé le, góbang lé wó garúm é bang, shuí-u râ chyunghuq wó é bang, laklaí dang ahú hú ge taí é bang lé, masat to bê nghut ri. <sup>29</sup> Banshoq bang gi, lagyô pé nghut lhê lhú? Banshoq bang gi, myiqhtoî pé nghut lhê lhú? Banshoq bang gi, mhoqshit bang nghut lhê lhú? Banshoq bang gi, laklaí kumlhá kut akô lhú? <sup>30</sup> Banshoq bang gi, nò lhoq ge é chyunghuq wó é nghut lhê lhú? Banshoq bang gi, laklaí dang ahú hú ge taí lhê lhú? Banshoq bang gi, dang haú pê é lichyúm ge taí sân kyô lhê lhú? <sup>31</sup> Nghut kôlhang, nungmoq gi, je gyaú é chyunghuq lé gyai yhang ô nau nyì keq.

### *Chyitdap Myit*

Hau htoq agó, ahkuî, ngò, nungmoq lé, je gyaú dik é hkyô ralhúm shit kôlé.

## 13

<sup>1</sup> Ngò gi, byu pê é eq maumang lagyô pê é myíng pé lé sê taí é nghut kôlhang, chyitdap myit a bo é nghut jáng, mying hung htê bo é ut eq mying tui htê bo é chapchéng su za dut byuq râ nghut lhê. <sup>2</sup> Ngò gi, myiqhtoî htoî é chyunghuq, zaú tô é hkyô pé banshoq lé sê gyô é nyan, sumsé hpaqchyî banshoq lé wó é eq, bùm pé lé wó htot nhang é lumjíng myit bo é nghut kôlhang, chyitdap myit a bo é nghut jáng, ngò haí a nghut sù dut berâ nghut lhê. <sup>3</sup> Ngò gi, wó é sutzè banshoq myùng bang lé byî pyâm é eq, ngá é gungdu lé nyhê pyám râ matú ap pyâm é nghut kôlhang, chyitdap myit a bo é nghut le gi, hai akyû a bò nghut ri.

<sup>4</sup> Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbùn é nghut lhê. <sup>5</sup> Chyitdap myit gi, hpau a dap é hkyô a kut,

yhumsing é akyû baú za a hô, luì za nhikjum a yo, shut é mara a matsîng é nghut lhê. <sup>6</sup> Chyitdap myit gi, agè ashop é má a gabú é za, haû tengmán hkyô má gabú nyi ri. <sup>7</sup> Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

<sup>8</sup> Chyitdap myit gi, hkâ-nhám le htâm byuq é a nghut. Myiqhtoi htoî é hkyô pé gi, byuq byuq râ nghut lhê; laklaí dang ahú hú ge taí é hkyô gi, zim byuq râ nghut lhê; sumsé hpaqchyî hkyô gi, laí ló byuq râ nghut lhê. <sup>9</sup> Hkâsu mù gâ le, nga-nhúng sê é gi, ra-am rahtâng ru nghut lhê. Nga-nhúng myiqhtoi htoî é gi, ra-am rahtâng ru nghut lhê. <sup>10</sup> Nghut kôlhang, gumjup hkyô jé lé é hkûn, a gumjup hkyô gi, byuq byuq râ nghut lhê. <sup>11</sup> Ngò, zoshâng nghut ashí hkûn gi, zoshâng dông dang taí, zoshâng dông myit, zoshâng dông myit sôn wú é nghut lhê. Ngò, suwún nghut jáng gi, zoshâng nyi yap hkyô pé lé tô pyám bê nghut lhê. <sup>12</sup> Ahkuî, nga-nhúng gi, myoqjàm hkaû mâ é rago a sân é wupzo lé za myàng é nghut lhê; nghut kôlhang, htâng má, myoqdong hkyûm wó myâng râ nghut lhê. Ahkuî, ngò gi, ra-am rahtâng za sê é ru nghut lhê; nghut kôlhang, Garai Gasang gi, ngo lé gumjup shoq sê é su, ngò le, htâng má, gumjup shoq sé râ nghut lhê.

<sup>13</sup> Ahkuî, lumjîng myit, myit myoqbyù hkyô, chyitdap myit shi sùm lhum myit tô ri. Nghut kôlhang, haú pé má é kô dik é gi, chyitdap myit nghut ri.

## 14

### *Myiqhtoi Htoi É Chyunghuq Pé Eq Laklaí Dang Nyo É Chyunghuq Pé*

<sup>1</sup> Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyi keq. Myiqhtoi htoî é chyunghuq lé je riyhang myit o nyi keq. <sup>2</sup> Hkâsu

mù gê le, laklaí dang ahú hú nyo é sù ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haû Woi-nyí eq nyo htoq é nghut ri. <sup>3</sup> Nghut kôlhang, myiqhtoi htoí é sù yuq hkangmó gi, byu pé lé wum byi dang eq nhik tíng dang taí ri. <sup>4</sup> Laklaí dang rahû nyo é sù gi, yhumsing gùng lé htuqbang byí ri, nghut kôlhang, myiqhtoi htoí é sù gi, noqkuq hpúng lé htuqbang byí ri. <sup>5</sup> Ngò gi, nungmoq yuq hkangmó laklaí dang ahú hú pé nyò râ lé ô nau ri, nghut kôlhang, nungmoq myiqhtoi htoi râ lé je ô nau é nghut lhê. Hkâsu mù gê le, laklaí dang ahú hú nyo é sù gi, haû noqkuq hpúng lé wó htuqbang râ matú, lichyúm lé taí sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

<sup>6</sup> Ahkuí, gumang wuì ê, ngò gi, nungmoq chyáng lé jé mù, laklaí dang pé nyo é nghut kôle, shing-rán nghut nghut, sumsé hpaqchyí nghut nghut, myiqhtoi dang nghut nghut, mhòqshit dang nghut nghut, nungmoq lé a taí kyô é nghut le gi, nungmoq é matú ngò hai akyû htoq râ lhú? <sup>7</sup> Htê lhoq htoq é asak a bo jung zè pé má lhang gi, sampyí nghut nghut, tíng nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé râ lhú? <sup>8</sup> Dum, tut htê le gam hkoq é đông a mut kyô é nghut jáng, majan htoq râ rì rì ó yuq wá hên râ lhú? <sup>9</sup> Nungmoq chyáng le haú đông nghut lhê. Nàng, laklaí dang ahú hú nyo le, sê gyô é danghkun mai nyo é za a nghut jáng, nàng haí taí nyi é lé ó yuq wá hkâsu wó sé râ lhú? Nungmoq gi, maulat má za taí hâng pyâm nyi kó râ nghut lhê. <sup>10</sup> Míngkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê. <sup>11</sup> Haû mù luí, rayuq yuq haí taí nyi é lichyúm lé ngò a dat chyup é nghut jáng, ngò gi, haû dang taí su é matú maigan byù dut mù, yhang gi, ngá

é matú maigan byù dut é nghut lhê. <sup>12</sup> Nungmoq chyáng le haù dông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyí bekô nghut mù, haù noqkuq hpúng lé kô myhâng nhang é chyunghuq pé lé je ho shikut nyí keq.

<sup>13</sup> Haù nghut é yanmai, laklaí dang ahú hú taí é sù ó yuq le, yhang haù taí é lichyúm wó taí sân kyo sháng gaq, kyûdung râ dut lhê. <sup>14</sup> Hkâsu mù gâ le, laklaí dang ahú hú dông ngò kyûdung é nghut jáng, ngá é woi-nyí mai dông é nghut lhê; nghut kôlhang, ngá é myitnyân é matú, hai akyû a wó nghut ri. <sup>15</sup> Haù mù, ngò hkâsu kut râ lhú? Ngò gi, ngá é woi-nyí mai le kyûdung râ, ngá é myitnyan mai le kyûdung râ nghut lhê; ngò gi, ngá é woi-nyí mai le mahkôn hkôn râ, ngá é myitnyan mai le mahkôn râ nghut lhê. <sup>16</sup> Nungmoq gi, nungmoq é woi-nyí mai za Garai Gasang lé hkya-on kô é nghut jáng, a sê gyô é bang mâ é rayuq gi, nungmoq haí taí é lé a sê é nghut mù, nungmoq jeju hkya-ôn é hkûn, "Amen" ga hkâsu wó taí râ lhú? <sup>17</sup> Nungmoq gi, ge dik shoq jeju hkya-on kô é abe, nghut kôlhang, góbang gi, htuqbâng é a hui kó nghut ri.

<sup>18</sup> Ngò gi, nungmoq banshoq bâng htoq má laklaí dang ahú hú je wó taí é yanmai, Garai Gasang lé jeju bûn ri. <sup>19</sup> Nghut kôlhang, noqkuq hpúng má, laklaí dang rahú dông danghkun ramun ngò taí râ htoq má, góbang lé mhoqshit râ akyû bo é dang ngo hkun taí râ lé ngò je ô nau ri.

<sup>20</sup> Gumang wuì ê, zoshâng wuì su myit nyi é lé nô pyám keq. Agè ashop hkyô eq sêng é má gi, nyheqnú dông kut mù, nungmoq myit é hkyô má gi, ko bang dông kut keq.

<sup>21</sup> Haù jep é tarâ má kê tô é gi,

"A wó gyô wú é dang dông mai le, góming byu pê é nhutwuì dông mai le, byù shí bang lé ngò taí râ

nghut lhê;  
 nghut kôlhang, yhangmoq gi, ngá dang gyo kó râ a nghut.<sup>1</sup>  
 ga Yhumsîng taî ri."<sup>✧</sup>  
 gâ ri.

<sup>22</sup> Haû mù, laklaí dang ahú hú nyo é hkyô gi, lumjîng bâng matú kumlhá a nghut é za, a lumjîng bâng matú sheq ru nghut lhê. Myiqhtoi dang kúm gi, a lumjîng bâng matú a nghut é za, lumjîng bâng matú sheq ru nghut lhê.

<sup>23</sup> Haû nghut mù, noqkuq hpúng gón chôm zing mù, yuq hkgangmó laklaí dang ahú hú nyò kô é nghut jáng, a sê gyô é bang nghut nghut, a lumjîng é bang nghut nghut, wang lé kô é hkûn, yhangmoq gi, nungmoq nâ bùm bekô ga a taí kó râ nghut lhê lhú?

<sup>24</sup> Nghut kôlhang, yuq hkgangmó, myiqhtoi dang taî nyi é u má, a lumjîng sù nghut nghut, a sê gyô é sù nghut nghut, wang lé é nghut jáng, yhang gi, yubak dap sù rayuq nghut é lé, banshoq èq lhoq pûn kyîng é hui râ eq, banshoq èq jéyáng é hui râ nghut é htoq agó,

<sup>25</sup> yhâng é i-myt má záú tô é hkyô pé lé de de lhoq htoq shit é hui râ nghut lhê. Haû mù, yhang gi, ngóm gop luî, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga taî pyo htoq kat râ nghut lhê.

### *Shuq Shuq Tap Tap Za Noqkuq Râ Hkyô*

<sup>26</sup> Haû jáng, gumang wuî è, nga-nhúng haî taí râ lhú? Nungmoq rahá lé chôm zîng é hkûn, yuq hkgangmó gi, Garai hkya-on mahkôn nghut nghut, mhoqshit é dang nghut nghut, shing-rán nghut nghut, laklaí dang ahú hú nyo é hkyô nghut nghut, taî sân kyô é nghut nghut pé lé, wó le ge ri. Haú pé banshoq gi, noqkuq hpúng lé wum-o byi râ matú chyat kut é dut râ lhê. <sup>27</sup> Rayuq yuq, laklaí dang ahú hú nyo é nghut jáng, í yuq eq myô htum sum

✧ 14:21 Esai 28:11-12

yuq mai a lai é za, rayuq htâng rayuq nyò râ dut é htoq agó, rayuq yuq haû lé taí sân kyo ra râ dut lhê. <sup>28</sup> Taí san kyô é sù a nyi é nghut jáng, laklai dang ahú hú nyo é sù gi, noqkuq hpúng má zim za nyi râ dut mù, yhânggùng yhang eq Garai Gasang lé za nyo râ dut lhê.

<sup>29</sup> Myiqhtoi í yuq nghut nghut, sum yuq nghut nghut taí kyo râ dut lhê; góbang gi, haí taí é lé rago gyô chyam wú râ dut lhê. <sup>30</sup> Nghut kôlhang, zung tô é sù rayuq yuq chyáng shing-rán jé é nghut jáng, hí taí nyi é sù gi, nô byuq râ dut lhê. <sup>31</sup> Hkâsu mù gâ le, yuq hkangmó gi, mhoqshit é eq myit wum byi é wó hui kó sháng gaq, nungmoq banshoq bang gi, rayuq htâng rayuq myiqhtoi wó htoí é nghut lhê. <sup>32</sup> Haû myiqhtoí pê é woi-nyí pé gi, myiqhtoí pé uphkanq é a-ô má nghut nyi ri. <sup>33</sup> Hkâsu mù gâ le, Garai Gasang gi, atau ahû dut é Garai Gasang a nghut é za, nguingón hkyo é Garai Gasang ru nghut lhê.

Sân-yúng bâng zing tô é hpúng banshoq mâ é eq rajung za, <sup>34</sup> myiwe wui gi, noqkuq hpúng pé má zim za nyi râ dut lhê. Yhangmoq gi, dang taí ahkáng a wó é nghut mù, haû jep é tarâ má bo é eq rajung za a-ô má nyi kó sháng gaq. <sup>35</sup> Yhangmoq gi, rajung jung sé naû kô é nghut jáng, yhûm má yhangmoq é yhumsing hpô pê chyáng myi kó sháng gaq; hkâsu mù gâ le, myiwe rayuq noqkuq hpúng má dang taí é gi, ahoq ahî hkyô nghut ri.

<sup>36</sup> Haû Garai Gasâng é mungdang gi, nungmoq chyáng mai htoq lo é nghut lhê lhú? Haû gi, nungmoq chyáng za lé jé bê nghut lhê lhú? <sup>37</sup> Rayuq yuq, yhang gi, myiqhtoi, a nghut jáng, woi-nyí chyunghuq byi é hui sù nghut lhê ga myit é nghut jáng, ngò, nungmoq lé ká byi é pé gi, haû Yhumsing é hkunmó nghut é lé, yhang sê yù sháng gaq. <sup>38</sup> Yhang gi, haû lé haí su a ngàm kut é nghut jáng, yhânggùng le, haí su a ngàm kut é hui zo râ nghut lhê.

<sup>39</sup> Haû mù luî, ngá é gumang wuì ê, myiqhtoi htoi râ lé ô nau nyì mù, laklaí dang ahú hú nyo é lé hkâhkûm pyám kó. <sup>40</sup> Nghut kôlhang, jung hkangmó gi, htuk é đông eq shuq shuq tap tap zâ é hkyô đông kut é dut râ lhê.

## 15

### *Hkrisduq É Dui Toq Hkyô*

<sup>1</sup> Gumang wuì ê, ngò, nungmoq lé hko kyo bê nghut mù, nungmoq le hap yù luî, nungmoq yap gîng tô é jowò nghut é gabú danglù hkyô lé, ahkuî, ngò, nungmoq lé lhoq pûn kat nau ri. <sup>2</sup> Ngò, nungmoq lé hko kyo bê é mungdang lé, nungmoq ging ging myhik zing nyì kô é nghut jáng, nungmoq gi, gabú danglù hau é yanmai hkyi yù huì é nghut akô. Haû a nghut jáng, nungmoq lumjîng é gi, akôm dut bê nghut lhê.

<sup>3</sup> Ngò hap yu tô é pé lé, sângh-*hi* ahkyak é đông, ngò, nungmoq lé hai byi bê nghut lhê. Haú pé gi: Chyúmdang eq rajung za, Hkrisduq gi, nga-nhûng é yubak marâ é matú shî hkám byi bê gâ é nghut ri; <sup>4</sup> Yhang gi, myhup yhûm é hui luî, Chyúmdang eq rajung za sum nyí nghu é nyí má lhoq dui toq é hui bê nghut mù, <sup>5</sup> Petruq lé htoq shit luî, haû lagyo raxe í yuq lé le htoq shit ri. <sup>6</sup> Hau htâng má, Yhang gi, ra-u má za, gumang wuì ngo shô yuq chyân lé htoq shit ri. Haú bang mâ é myo hpyang gi, ahkuî jé shoq asak dui nyi bum akô; ra-am kúm gi, shi ló byuq bekô nghut ri. <sup>7</sup> Hau htâng, Yhang gi, Yakuq lé htoq shit mù lagyô pé banshoq bang lé htoq shit ri. <sup>8</sup> Ló htâng má, Yhang gi, hkû buinyi a jé shî é má hku é đông nghut sù ngo lé le htoq shit bê nghut ri.

<sup>9</sup> Hkâsù mù gâ le, ngò gi, lagyô pé mâ é tiq dik sù nghut lhê. Haû Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghû râ lháng a gingdán é sù nghut lhê. <sup>10</sup> Nghut kôlhang, ngò ahkuî îsu wó nghut



nyi é gi, Garai Gasâng jeju mai nghut lhê. Yhâng é jeju gi, ngá chyang akôm a dut é za, ngò gi, yhangmoq banshoq bâng htoq má je riyhang mù wùn waq shikut lhê. Haû gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê. <sup>11</sup> Haû mù luî, ngò nghut nghut, yhangmoq nghut nghut, ngamoq hko kyô é gi, haû hkyô chyat nghut lui, nungmoq lumjîng é le, haû hkyô nghut ri.

### *Shi Byuq Bâng É Dui Toq Hkyô*

<sup>12</sup> Nghut kôlhang, haû Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq mâ é ra-am gi, shi byuq bâng é dui toq hkyô a joq nghû, hkâsu wó tái kó râ lhú? <sup>13</sup> Shi byuq bâng é dui toq hkyô a joq é ru nghut le gi, Hkrisduq le lhoq dui toq é hui berâ a nghut. <sup>14</sup> Hau htoq agó, Hkrisduq gi, lhoq dui toq é a huî é ru nghut le gi, ngamoq hko kyô é hkyô eq, nungmoq é lumjîng hkyô gi, akôm dut byuq râ nghut lhê. <sup>15</sup> Hau htoq agó, Garai Gasang gi, haû Hkrisduq lé shi é mai lhoq dui toq bê hkyô lé, ngamoq saksé hkâm bê nghut é yanmai, ngamoq gi, Garai Gasâng é hkyô má saksé apyoq pé dut byuq râ za nghut lhê. Nghut kôlhang, shi byuq bang lhoq dui toq huî é hkyak a joq é ru nghut le gi, Garai Gasang, Yhang lé lhoq dui toq kat râ a nghut. <sup>16</sup> Hkâsu mù gâ le, haû shi byuq bang lhoq dui toq é a huî é nghut jâng, Hkrisduq le, lhoq dui toq é hui berâ a nghut. <sup>17</sup> Hkrisduq gi, lhoq dui toq é a huî é nghut jâng, nungmoq é lumjîng hkyô gi, akôm dut luî, nungmoq gi, nungmoq é yubak mara hkaû má ru nyi nyi shi kó râ nghut lhê. <sup>18</sup> Haû nghut jâng, Hkrisduq má shi ló byuq bê bang le, htên byoq byuq râ za nghut lhê. <sup>19</sup> Nga-nhúng gi, shí ipyat lhê é matú za, Hkrisduq má myit myoqbyù hkyô wó é nghut jâng, byù banshoq bâng htoq má shogyo rayhup dut é je hui zo bang dut kó râ nghut lhê.

<sup>20</sup> Nghut kôlhang, Hkrisduq gi, gè gè yang shi é mai lhoq dui toq é hui bê nghut mù, shi ló byuq bâng é sâng-hi ashi dut bê nghut ri. <sup>21</sup> Hkâsu mù gâ le, shî-nò hkyô gi, byù rayuq đông mai lò bê nghut é eq rajung za, shi byuq bâng é dui toq hkyô le, byù rayuq đông mai lo é nghut lê. <sup>22</sup> Hkâsu mù gâ le, lhunglhang bang gi, Adam é yanmai shi byuq é su, lhunglhang bang gi, Hkrisduq eq rading ralhūm za nghut é yanmai lhoq dui toq é hui râ nghut lê. <sup>23</sup> Nghut kôlhang, yuq hkangmó gi, ó le ó âng é hkûn lhoq dui toq é hui râ nghut lê: Hkrisduq gi, sâng-hi lhoq dui toq huí é sū nghut lê. Hau htâng má, Yhang jé lé é hkûn, Yhang eq sêng é bang lhoq dui toq é hui râ nghut lê. <sup>24</sup> Hau htâng, jiltûm jé râ nghut lê; haú hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haú Iwa nghut sū Garai Gasang lé mingdán ap byi râ nghut lê. <sup>25</sup> Hkâsu mù gâ le, Yhang gi, Yhâng é gye pé banshoq lé, Yhâng é hkyî wang ô má tô pyâm é hkûn jé shoq up nyi ra râ nghut lê. <sup>26</sup> Haú lhoq htên pyâm é hui râ nghut é ló htâng é gye gi, shî-nò hkyô nghut ri. <sup>27</sup> Hkâsu mù gâ le, "Garai Gasang gi, jung hkangmó lé, Yhâng é hkyî wang ô má tô pyám bê nghut ri."☆ gâ Chyúmdang má kê tô ri. "Jung hkangmó lé" Yhâng é a-ô má tô pyám bê ga taí é hkûn, jung hkangmó lé Hkrisduq é a-ô má tô pyám bê sū Garai Gasang yang kúm a lom é hkyô, san za nghut nyi ri. <sup>28</sup> Yhang gi, haú hkyô ban kut é htâng má, haú Zo yang le, jung hkangmó lé Yhâng é a-ô má to byi bê sū Garai Gasang é a-ô má nyi sū dut nhang é hui râ nghut mù, Garai Gasang gi, lhunglhang htoq má gyaú sū nghut luí, lhunglhang lé sîng sū nghut râ nghut lê.

<sup>29</sup> Dui toq hkyô a joq é ru nghut le gi, shi byuq bê bâng é matú wui-myhup hkám byî bùm kê é gi, hai akyû bò kó râ

---

☆ 15:27 Hkya-on 8:6

lhu? Haû shi byuq bang lhoq dui toq é a hui kô é ru nghut le gi, yhangmoq matú haî mù byu pé wui-myhup hkâm yù kó râ lhu? <sup>30</sup> Ngamoq gi, ngamoq é matú, hkyíng hkangmó haî mù chiq râ jowò má nyi râ lhê lhu? <sup>31</sup> Gumang wui ê, ngò gi, nyí wui aluq shoî shoî shi é hui zô é nghut lhê. Haû su nghû é gi, nga-nhung é Yhumsîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê. <sup>32</sup> Ngò gi, xângzo hkyam dông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò râ lhu? Shi byuq bang lhoq dui toq é a huí é ru nghut le gi,

"Nga-nhung gi, napmá shî râ nghut é yanmai,  
zo sháng, shuq sháng."✧

ngû râ za nghut lhê.\* <sup>33</sup> "A ge é zùm yap luzúm wui gi, ge é nyi yap sâmlai lé hten nhang é nghut lhê." gâ é sanghkyang eq rajung za, hkyô shuí nghoq é hkâhui zo kó! <sup>34</sup> Nungmoq gi, tau bûn gyíng lò mù, mara hkâkut shut lo kó; hkâsu mù gâ le, Garai Gasang lé a sê é byù ra-am nyi akô. Ngò haû su nghû taî é gi, nungmoq hoq bun râ matú nghut lhê.

### *Dui Toq É Gungdu*

<sup>35</sup> Nghut kôlhang, rayuq yuq gi, "Haû shi byuq bê bang, hkâsu kut lhoq dui toq é hui kó râ lhu? Yhangmoq gi, hkasû é gungdu nghut kó râ lhu?" ga myi râ nghut lhê. <sup>36</sup> Haû-í nghâ sù ê! Nàng hô hkyô kat é pé gi, shi byuq é za a nghut jáng, yuq htoq lô râ a nghut mhaî. <sup>37</sup> Nàng, kyô hkyô é hkûn, yuq lò râ nghut é agàm lé hô hkat e a nghut é za, sungso amyui nghut nghut, gotû amyui rajung jung nghut nghut lé za hô kat é ru nghut lhê. <sup>38</sup> Nghut kôlhang, Garai Gasang gi, Yhang myit hpyit to bê eq rajung za haû

✧ 15:32 Esai 22:13 \* 15:32 Dang ngho shî gi, a lumjîng bang taî é dang nghut lhê.

lé gungdu ralhum byi mù, kyôshi myui hkanmó lé, ó le ô é gungdu byi ri. <sup>39</sup> Gungsho lhunglhang gi, rajung za a nghut. Byù pê é gungsho gi, rajung, dusak pê é gi, gó jung, nghoq pê é gi, gó jung, ngozo pê é gi, gó jung ru nghut lhê. <sup>40</sup> Mauhkûng gùng pé le joq é nghut luî, myidam gùng pé le joq ri; nghut kôlhang, mauhkûng gùng pê é shingkan gi, rajung, myidam gùng pê é shingkan gi, gó jung ru nghut lhê. <sup>41</sup> Haû bui má bo é shingkan gi, rajung, lhamó mâ é gi, gó jung, kyî pé mâ é gi, gó jung ru nghut lhê; kyî racham eq rachâm é shingkan le gotû tû shai lhûm lhê.

<sup>42</sup> Haû mù, shi byuq bê bang é dui toq hkyô le, haû eq rajung za nghut ri. Haû hô hkyô kat é gungdu gi, htên byoq sê é nghut luî, lhoq dui toq huî é gungdu kúm gi, htên byoq a sê é nghut lhê. <sup>43</sup> Hô hkyô kat é hkûn gi, aróng a bò, lhoq dui toq huî é hkûn gi, hpungwup shingkan bo ri. Hô hkyô kat é hkûn gi, wum nyhóm mù, lhoq dui toq huî é hkûn gi, a-tsam bo ri. <sup>44</sup> Gungsho gungdu gi, hô hkyô é hui mù, woi-nyí gungdu gi, lhoq dui toq é huî ri.

Gungsho gungdu joq é nghut le gi, woi-nyí gungdu le joq é nghut lhê. <sup>45</sup> Haû nghut mù, "Haû sângh-*hi* yuq byù Adam gi, asak dui é xângzo dut bê nghut ri."☆ ga kê tô ri. Haû ló htâng é Adam kúm gi, asak byi é woi-nyí nghut ri.† <sup>46</sup> Haû woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê. <sup>47</sup> Haû sângh-*hi* yuq byù gi, myidàm mâ é tseyûn lé sai é nghut mù, htang lhê yuq byù gi, mauhkûng htoq mâ é nghut ri. <sup>48</sup> Haû myidàm byù nghut sù su, myidàm eq sêng é bang le nghut nyi akô; haû mauhkûng htoq mâ é byù nghut sù su, mauhkûng eq sêng é bang le nghut nyi akô. <sup>49</sup> Nga-nhúng gi, myidàm byù é gunghkyâng isâm lé hkam yù bê nghut é su, mauhkûng

---

☆ 15:45 Apûn 2:7 † 15:45 Ló htâng é Adam gi, Yesuq lé tái nau é nghut lhê.

htoq mâ é byu é gungghyâng isâm lé le myang hkam yù râ nghut lhê.

<sup>50</sup> Gumang wuì ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yû râ a nghut, htên byoq sê é le, htên byoq a sê é silí wunlí lé wó yû râ a nghut. <sup>51</sup> Gyo to keq, zaú tô é hkyô lé, ngò, nungmoq lé taí kyo kôlé: Nga-nhúng banshoq bang gi, shi byuq râ a nghut é za, htaí lhik é hui râ ru nghut lhê. <sup>52</sup> Haú gi, ló htâng é tut htê mying é hkûn, ralhap za, myoqkuq ralap má dut râ nghut lhê. Hkâsu mù gâ le, tut htê mying râ nghut lhê, haú hkûn, shi byuq bê bang gi, htên byoq a sê é shut lhoq dui toq yu é hui râ nghut mù, nga-nhúng gi, htaí lhik é hui râ nghut lhê. <sup>53</sup> Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù râ dut é nghut lhê. <sup>54</sup> Haú htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkûn sheq, "Shî-nò hkyô gi, ûng budâng èq myui pyâm é hui bê nghut ri."☆ ga kê tô é eq,

<sup>55</sup> "Shî-nò hkyô ê, náng é ûng budang gi, hkâmá lú? Shî-nò hkyô ê, náng é nyin gi, hkâmá lú?"☆

gâ tô é sanghkyang gi, dik râ nghut lhê. <sup>56</sup> Haú shî-nò hkyô é nyin gi, yubak mara nghut ri; yubak marâ é a-tsam gi, jep é tarâ nghut ri. <sup>57</sup> Nghut kôlhang, Garai Gasang lé jeju hkyâ-ôn lhê! Yhang gi, nga-nhúng é Yhumsîng Yesuq Hkrisduq đông mai, nga-nhúng lé ûng budang byî é nghut ri.

<sup>58</sup> Haú mù luí, ngá é chyitdap gumang wuì ê, yap gingtîng nyì keq. Hai èq le, nungmoq lé hkâlhoq dui nún nhâng kó. Nungmoq gi, haú Yhumsîng má nungmoq wùn waq é muzó akôm a nghut é lé sé kê é nghut lhê yanmai, haú Yhumsîng é muzó lé ayang wùn waq shikut nyì keq.

☆ 15:54 Esai 25:8 ☆ 15:55 Hos 13:14

## 16

*Yerusalem Wà Mó Mâ É Lumjǐng Bàng É Matú Alu Hkyuî Râ Hkyô*

<sup>1</sup> Ahkuî, Garai Gasâng é byu pê é matú alu hkyuî râ hkyô eq séng luî gi, haû Galatiq mau mâ é noqkuq hpûng pé lé ngò kut nhang é su kut keq. <sup>2</sup> Ngò jé lé é hkûn, alu hkyuî râ hkyô a kut ra râ dông, bat hkangmó mâ é sâng-hi nyí má, yuq hkangmó gi, yhumsîng wó ho é má cháng mù, gam tô to lánq keq. <sup>3</sup> Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó má ê dé nhâng râ nghut lhê. <sup>4</sup> Ngò le ê ang râ dut é nghut jáng, yhangmoq gi, ngá é byinzùm kut râ nghut lhê.

*Poluq Lum Kat É Hkyô Pé*

<sup>5</sup> Ngò gi, Makedoni mau laî byit é htâng, nungmoq chyáng jé lé râ nghut lhê. Hkâsu mù gâ le, ngò gi, Makedoni mau laî byit râ za nghut lhê. <sup>6</sup> Ngò hkâmá ê kôlhang, ngá é hkyowuî má nungmoq wó garúm kat kó râ matú, ngò gi, rayoq zo nghut nghut, gyoqmyò lháng lai shoq nghut nghut, nungmoq eq rahá nyi abe. <sup>7</sup> Ngò gi, laî ló uchyang za nungmoq lé lé kum râ nghut mù, ahkuî wó myâng râ lé a nau é nghut lhê; ngò gi, haû Yhumsîng dóng é nghut jáng, nungmoq eq rahá rayoq nyi râ lé myit myoqbyu lhê. <sup>8</sup> Nghut kôlhang, ngò gi, Penteko-ti pôi buinyi jé shoq Ehpesu myuq má nyi râ nghut lhê. <sup>9</sup> Haî mù gâ le, ngo lé htuq htǐng é bang myo myo nyi é nghut kôlhang, akyû htoq é muzó é matú hkum mó ngo lé hpông to byî é yanmai nghut lhê.

<sup>10</sup> Timohti jé lé jáng, yhang, nungmoq eq rahá nyi é u má, gyuq é hkyô haî le a joq râ matú wú byi keq; hkâsu mù gâ le, yhang gi, haû Yhumsing é muzó lé, ngò su wùn waq wún é sù nghut lhê. <sup>11</sup> Haû mù, ó yuq le, yhang lé hkâwú

shóm kó. Yhang gi, ngá chyáng wó dum taû jé sháng gaq, yhâng é hkyowui má nguingón é dông nhang kat keq. Haû gumang wui eq rahá lò kó râ lé, ngò myit láng nyi lhê.

<sup>12</sup> Ahkuî, nga-nhông é gumang Apolo é hkyô eq séng luî ga jang: yhang gi, haû gumang wui eq rahá nungmoq chyáng lé râ lé, ngò, gyai yhang wum taî tsuq lhê. Yhang kúm gi, ahkuî lé nau é myit a dê bò shi, nghut kôlhang, yuqyo é ahkyíng wó jáng, yhang lé lô râ nghut lhê.

<sup>13</sup> Machya nyî keq; lumjínq hkyô má ging ging tíng tíng yap nyî keq; gyuq kyum myit hkâbô kó; wum bo nyî keq.

<sup>14</sup> Jung hkangmó lé, chyitdap myit eq zui saí keq.

<sup>15</sup> Stehpana eq yhâng é yhumbyù wui gi, Ahkaia ming má sâng-hi hpúng wâng bang nghut luî, yhangmoq gi, yhumsîng gùng lé, haû sân-yúng bâng é dojaú hkyô má ap nóng bekô lé, nungmoq sê akô nghut ri. Gumang wui ê, ngò, nungmoq lé wum taî tsuq kat kôlé, <sup>16</sup> haû sù é bâng é a-ô má le, haû muzó má bo wang lòm mù, mù zui shikut bang yuq hkangmó é a-ô má le, nyî keq. <sup>17</sup> Ngò gi, Stehpana, Hportunatu eq Ahkaiku pé jé lo é hkûn, gyai gabú é nghut lhê, haî mù gâ le, yhangmoq gi, nungmoq a kut byî é hkyô lé, lhoq pyíng byi bekô nghut ri. <sup>18</sup> Hkâsu mù gâ le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haû sù é bang lé, hpautap nyî keq.

### *Ló Htâng É Shi-kyâm Dang*

<sup>19</sup> Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhûm má chôm huî é noqkuq hpúng lé, haû Yhumsîng má nungmoq lé gyai yhang shi-kyâm kat akô. <sup>20</sup> Shí má nyi é gumang wui banshoq bang gi, nungmoq lé shi-kyâm kat akô. Rayuq eq rayuq chyoiyúng é chyitpuq èq shi-kyâm lhum keq.

<sup>21</sup> Ngò, Poluq gi, shi-kyám dang shî lé, ngá é loq èq yhang ká é nghut lhê.

<sup>22</sup> Rayuq yuq, haû Yhumsîng lé a chytđap é nghut jáng, haú yuq gi, nhîng pyâm é hui sháng gaq. Yhumsîng ê, jé lé aq hkoi!

<sup>23</sup> Haû Yhumsîng Yesuq é jeju gi, nungmoq eq rahá nghut nyî sháng gaq.

<sup>24</sup> Ngá é chytđap myit gi, Hkrisđuq Yesuq má nungmoq banshoq bâng chyáng joq nyî sháng gaq. Amen.



## Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

### Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates  
eBible.org

---

PDF generated using Haiola and XeLaTeX on 17 Nov 2018 from source files dated 20 Jan 2018

23f9fc55-a8a4-59ef-9513-707ec336b0ee